



## FA'AFEILOA'IGA MAI LE OFISA TUTOTONU OLE KAPELANISIA

Fepuari2021

O Tulimata'ala na ma'ape ai le faleali'i ole Atunu'u i Aiga e iva o Lealali. Tolu fale muamua, fale ta'ita'i, Aiga Sa Malietoā, Faletui. Tolu fale o Salemuli'aga ma le Hale ole Alataua, ua mapu'e fa'alau o malo'u ai nei Samoa. Aua o Samoa ole Matāfanua, o Upolu ole Matāfanua e afua mai i Lalovi ma Laulala ma Malaefono i Matāutuāāi seia pāia le tulātālā ile Fatuosofia.

O Savai'i ole matāfanua, e afua atu Fufifatu seia pāia Vailoa. O Tutuila, ole matāfanua e afua atu ile mātatula seia pāia Laloifi ma le falesau ma le fale o Māvaega. O Gagamoe ma Utumoe a'au, o Loitafuna ma mālo tumau, o Togalelei ma Talamoa, o Falefasa ma Lotomua. O Manu'a ole fanua e afua mai i Fitiuta seia pāia Tā'ū. O Samoa ole fanua e afua mai i Malaetele ile Taisamasama ole Tuimanu'a seia pāia Fili ma Puletu'u ile taiulaula o Nafanua na tauilo ai Malo. Auā ua tupu le tai, ua tupu le vai, ua fanau le papa, ua fai tauina Nu'u ua fua selau ma le fua sefulu. O lou aoao tētēlega lena e afua mai i ona matātula seia paia ona matāfanua.

Le Paia e ile tatou Kapelenisia Samoa, e fa'asifo lava le tautai ole igafo, ma fa'alepa ma le fa'aeteete, aua ole tala e fai ile gataifale, e fai fo'i ole galu fati a'o le muliauma. O le ala lava lea ole fa'aalāvā'a i taimasa o se leo oa outou auauna, ma matou fa'apea atu ai, matou te tā-liu lava ile va'atele ae matou te popole ne'i pisia o matou matai le tāgāliu, aua e latulatu le vasa.

Matou te fia seu fo'i ile atutia, ae lili'a auā e le oge lavelave le vaosā o Sāmoa. Ua leva ona matou fia fou alaga, ae ne'i mea ane ua sula'esea le mau a Lealailefue, i so matou lagona fia fa'aiilo, ona o lenei fo'i ua tu'u i tai le sa ole Kapelenisia Samoa i totonu ole Pule'aga Fa'aakiepikopō i totonu ole Laumua mo lana folauga fa'aleagaga, o lenei fo'i Tausaga Fou 2021.

Ae avea ia le alofa-tausi va'atele ole Atua Paia silisili'ese, ua uimagalo ai so matou leo, e matou te fa'apea atu ai. E'e maia ile tumutumu ole faleselau, ae se'i o matou sē'ei ifo ile va i pou o mālō, se'i mata'afa tu'umuliga o fausaga ole va'atele i outou Pa'ia fa'alanugātā e afua mai ile 'ite ile malama i Saua, seia sūluia le faitoto'a ole maota o Nafanua, o ala o manū le uia.

Ia ae matou te fa'apea atu ia, tulou, tulou, tulouna lava. Tulouna ia le fa'anōnōgāmanū a le va'alanu ole Talalelei ile Afio o lo tatou Tamā, le Afioga ile Ali'i Katinale John Dew, afifio le Paia ile Ituiga-sa, Susuga i Fa'afeagaiga Taulagi ma Faletua o lo'o latou ta'aseu i tafa e fia ole laumua, ina se'i lalase po'upo'ua ole agasala, ae vaimagalo agaga uma ile Mana silisliese ole Agaga Paia, ma momoli ai tatou uma ma le au fa'atuatua ile Atua o Malo, e ala atu ile fautua tatalo a lo tatou Tina Paia o Maria le Fetu ole Moana, e le mafai fo'i ona vāea le falao'oto ile tapu'iga a si o tatou Tina malōlōfa'aeaina, aua e le salā upu e fai i faiva o tapua'iga. Se ua fa'amalo le tatalo.

Fā'atulou atu ile nofo a nofoa o Eklesia e fia ole tatou Kapelenisia ma o outou laulau, ae tainane le Paia maualuga i tupu ma tamali'i, le falalese'e o faleupolu, le tapua'iga mau i nai o tatou tuaā sinasina, o faletua ma tausi aemaise le mamalu tele ole tatou Kapelenisia Samoa i ona muliauma 'ese'ese..ta'alolo la'ia o outou sā ma faigā, e le toe pouponua fa'afalegase, nu'unu'u atu fa'atini o tausala. O le upu moni, a tulia le igafo ole mafua taulalo, e fa'afuase'i ona ta'alili le nofoa ole tautai, afai la ae nonoi ile i'a, e mautinoa lava e se le atu i ama, aua e le sili le ta'i, i la outou tapuaiga mamana.

Ae tau ia ina matou fa'apea atu ma le agaga maualalo, aua e le sili sa matou upu i lo fa'alumaga fa'aleagaga e pei ona folafolaina e lo tatou Tamā Katinale, o lo tatou fa'alumaga ma

## FAIGA MASANI O LE FAGAFULU: NISI O ILOILOGA AOGĀ

O le fasefulu aso o tatalo o le fagafulu, agaponi, ma le lima foa'i i le au matitiva ua fuafuaina e liliua o tatou loto i le Atua ma mana'oga a isi, aemaise latou e aupito vaivai o lo'o si'osi'omia ai i tatou.

O le foa'i i le aumatitiva e ao ona sili atu i lo le avatu na o ni talā i lē ua leai se aiga ina ia tulī 'ese atu ai. E a'afia ai le faia o se mea e sili lona lelei ina ia mautinoia ai o le meaalofa ua fesoasoani atu i ai e fa'aleleia ai i lo le fa'aleaga atili ai o le tulaga ua i ai. O tatalo e ao ona sili atu i lo na o upu, I le fa'asaoina ai o se taimi ma se avanoa e feilo'i moni atu ai i le Ali'i ma latou ua ia popole i ai. E tatou ona tatou mafaufau pe fa'apefea ona fuafua avanoa mo tatalo. E pei ona tatou fuafua e feilo'i atu i ni fa'uō ina ia tatou fa'asoa atu ni tala fou, o tatou fiafiaga ma fa'anoanoaga, ona tatou fausia lea o se malumalu i totonus o tatou lava, e feilo'i atu ai i le Ali'i e o'o lava i na taimi e le mafai ai ona tatou o atu i se falesa.

O le agaponi e sili ona faigatā, ona e lē na o le fa'aititia o mea'ai, 'ai lelei po'o le amio pulea, e ui o le a a'afia ai fo'i ma latou. O se auala e iloaina ai mea tatou te mana'omia, ina ia 'aua ne'i avea o tatou galala e fa'ateleina ai mea e 'ai. Ua mautinoia lelei lava le faigofie ona fa'apea mai – tosiasi lava ae ao fo'i ona tatou fa'aeteete ina ne'i maua i le ulu tigā ona o le anapogi, e tatou lava ona fai sina mea'ai ina ia lelei ai se fa'atasiga ma isi.

E maua mai ni nai manatu mai i tulafono e valu a Sagato Ikenasio 'ina ia fa'atulaga se tasi mo le lumana'i i le faigā taumafa,' sa ia fa'atulaga ai e mulimuli mai i faigā metitasi i le Pasio ma le maliu a le Ali'i. O mea uma nei e fa'aoga i o tatou galala mo mea lelei: fa'amatalaga, fa'aogaina i aso nei e pei o computers ma telefoni, inuina o uaina, faigamalologa, lavalava ma mea fa'apenā. Ua au-mai ai fo'i ma nai manatu pe fa'apefea ona fa'atonutonu ai le taumafa mai mea ua tatou iloaina e lē tonu.

Na fautua mai Ikenasio e ao ona tatou 'a'ai i mea'ai manāia ma mea'ai fa'apitoa i lo mea'ai i aso uma e pei o le fala-

oa. E fa'apea fo'i ona fa'apea mai e ititi lava se taimi o le a e fa'aalu e siaki ai le tau po'o fa'atomuaga o tala fou i lo le fai o ta'aloga i le telefoni po'o le computer. Ua tatou fa'aogaina i faiga o mea'ai na o ni vaega ititi o na mea'ai fa'apitoa: ina ia tatou taumamafa i le tele o pa'agugu ae fa'aeteete i keke, ma e mafai ona tatou fa'amasani i le fa'aogaina o mea'ai fa'atauva'a i lo taumafa tu'u 'apa. E ao fo'i ona maitauina le a'afiaga mai mea'ai ua tatou fa'aogaina: e fesoasoani iā i tatou e alofa ma 'au'auna atu ai i le Atua ma a tatou tuā'oi; pe fa'alavelave iā i tatou? E aga'i ai i se olaga maloloina po'o se olaga nofo to'atasi ma ua na o 'oe ai lava? Ua tatou iloaina mea ua tatou mana'omiaina i le fa'aititia o mea ua tatou fa'aogaina vave, ma o le a lagonaina vave lona a'afiaga; ae afai ua a'afia tele ai tatou, ona tatou fa'atele lemū lea se'ia tatou maua se paleni.

A o tatou a'ai, e tu'u atu o tatou mata'itū ia Keriso ma ana Aposetolo i se faiga tutusa, mo se fa'ata'ita'iga o le tausama'aga mulimuli, ma taumafai e fa'ata'ita'i i auala na latou a'ai ai, ina ia fa'atosiga 'ese mai tatou mai i le fa'atinoaga o ni faiga'ai ma fa'amanatu mai iā i tatou o le mafu'a'aga o faiga'ai po'o 'aiga: ina ia tatou maua le malosi e vivi'i ai le Atua ma auauna atu mo le lelei laua'itele. E ao fo'i ona 'aua le fa'avavevaveina pe afai o lo'o 'a'ai, ae ia faifai mālie ina ia 'aua ai ne'i tele se taumafa.

Mulimuli lava, e sili pe a fuafua lelei pe o le a le tele ma o a fo'i ituaiiga o mea'ai e fa'amalie lelei ai, i lo le fia'a'ai pea. E pei ona tusia e Sagato Paulo iā Korinito: "o le 'ai'oiga ua fai i le suafa o Keriso: Auā o lē na le iloa le agasala, na faia o ia e le Atua ma agasala, mo i tatou; ina ia avea i tatou ma amiotonu a le Atua iā te ia."

O le autū lava, ua vala'auina i tatou e le Fagafulu ina ia iloaina ma fa'aogā o tatou sa'olotoga e pulea ai le 'ai so'o, ma ua mafai ai ona lagona o tatou uso a tagata ma le foafoaga ua fa'ailoa mai iā i tatou le vala'au a le Ali'i ina ia liliu o tatou loto ma mafaufau i tulaga uma o tatou olaga.

## FA'AFEILOA'IGA MAI LE OFISA TUTOTONU OLE KAPELENISIA

le ai fa'aleagaga lea e fai ma 'oso o la tatou savaliga umi o lenei fo'i Tausaga Fou. Aemaise fo'i ole fa'apaia'ina ma le toe fa'afouina oa tatou folafolaga, ma auina atu ai i tatou e fai ma molimau mo lana Talalelei, e ala i tofiga ma so'o se matafaioi 'ese'ese ole a tatou fa'asaga atu i ai, i totonus o aiga, o mafutaga, aemaise o Aulotu ma le Kapelenisia. Tau ia ina ia usu mai le lagi se 'ai mo la tatou ta'aseuga fa'aleagaga.

Manuia tele le sauniuni atu i le Vautausaga ole Fagafulu, tatou te toe to-manatu ai ia lesu i ona puapuaga e ala i lona maliu, ina ia tatou maua le manuia ma le ola e fa'avavau, e le gata ile ola nei, ma le ola atalā.

la manuia ona o Keriso

( Ofisa Tutotonu ole Kapelenisia Samoa Ueligitone)

# FAIGA MASANI O LE FAGAFULU: NISI O ILOILOGA AOGĀ

## O le Aso Lulu o le Lefulefu

O le faiga masani o le tu'uina o le lefulefu i le muaulu e fa'ailoa ai le salamō o se faiga na amata mai i le vaitau o le Feagaiga Tuai, ma o nisi o vaega na amata mai ai ua mafai ona maua mai i le au Senara, Aikupito, ma le au Roma, ae ua atagia mai o Pope Kelekolio le Silisili i le vaitau o le AD 600 na fa'avaeina le amataina ona avea ma vaega o sauniga Kerisiano o le aso muamua o le Fagafulu, ina ua ia fa'amautuina lea aso fa'apitoa o le lefulefu i lona 46 o aso i luma mai o le Eseta.

O lefulefu e mai laupama o le aso Sa o le palema, ua talafeagai ona saunia ma fa'apa'iaina, ua tu'uina i muāulu i le fa'ailoga o le koluse, i upu e pei o nei, fa'avae i le Kenese 3: 19, "Auā o le efuefu 'oe, e te toe fo'i atu lava i le efuefu." O le lefulefu ua fai ma fa'ailoga o tatou salamō, vaivaiga, olaga fa'aletino, ma le mana'omia o le fa'aolataga a le Atua.

O le aso Lulu o le lefulefu o le aso fo'i mo anapogi ma le leai o ni 'a'ano o manu fasi ma le 'ava malosi, ma e fa'ailoga ai le amataga o le fasefulu aso o sauniuniga fa'aleagaga mo le Eseta e ala i faiga tatalo, salamō, lima foa'i ma le fa'afitia o tatou e tatou lava – i ni auala 'ese'ese e fa'amanatu mai ai iā i tatou lo tatou fa'amoe-moe ile Atua ma le mana'omia ona tatou liliu atu iā te ia, ma avea ai le Atua o lo tatou lava ma o tatou fa'anaunauga o le ogatotonu o le lalolagi.

O le anapogi o le Aso Lulu o le lefulefu ma le vaitau o le tete'e atu i tu'inanau e lē faigatā tele e pei o le anapogi a Muselami i le Ramadam, ae ua fa'aoga o se auala e fa'amanatu mai iā i tatou le tāua o le pulea e le tagata lava

## O Malamalama i O'u Ala

O Ioane le Papatiso ma le Malaga Fou 'Ese Atu (Esoto Fou)

O Ioane le Papatiso, o se tasi o tagata tāua tele o le Atevetu. E pei ona fai mai le perofetaga a Isaia, o ia o le leo o lē "ua alaga i le vao: Inā teuteu ia outou le ala o le Ali'i". O le nofoaga sa i ai Ioane i le toafa ma fai ai ana gaioiga o le papatisoga e i ai ona tāua fa'atelosia. O Israaelu anamua, ina ua sosola 'ese mai le fa'apologaina i Aikupito, na ui mai le vai o le Sami Ulaula ma savavali ai mo le fasefulu tausaga i le toafa ma taunu'u ai i le Nu'u na Folafolaina.

I le taimi o Ioane, sa i ai se fa'anaunauga tele o le Mesia, le Mose Fou o le a taunu'u. O le mea lea na amata ai ona va'ava'i tagata mo se malaga 'ese atu fou, ma o le mea tonu lenei sa latou

ia pe afai tatou te mafaia ona tatou fai meaalofa -ia i tatou lava ma auauna atu. Ua tatou anapogi mai mea'ai fa'alalo nei – i se auala fa'afa'iloga – ina ia tatou maua le ola e sau mai lugā. I upu mai se tasi o faife'au "O Kerisiano uma ta'itasi, po'o le a lava lona ituaiga, o lona uiga e fa'apea mai 'loe' i se mea e sili atu lona moni."

O se "mea e silisili atu" e sau iā i tatou e ala mai i le ola, maliu ma le toetū fa'alalo nei o lesu, o le mafua'aga lea ua tatou mata'itū ai i metitasio i le vaitau lenei o le liutino tagata o lo tatou Ali'i, ma taimi o ana fo'i sauniuniga i le vaotu'ufua o lana auaunaga ma lana Pasio.

Fai mai se tasi o molimau e "ui i le malosi o le tulaga fa'asosaiete i nei aso, o le fa'atuatuaga Kerisiano, i le vaitau o le Fagafulu, o lo'o manino lelei lo latou manatu i le mana'omia ona liliu le mafaufa aga'i i le moni e sili atu le tāua." O le fa'afiti e le tagata o ia lava ua "fa'auigaina i se galuega lelei ma le tutū fa'atasi ma le au matitiva ma latou e leai ni aiga.

O lo'o fa'amanatu mai fo'i iā i tatou o latou le au fa'atutua e lē talia so'o le sakalameta o le Togisala ma le Eukalisitia Pa'ia "e ao ona malamalama i le tu masani fa'akalesia e o fa'atasi ma le manatu o le kofesioina o agasala mamafa" ma le Fagafulu, ma e tatau ona talia le komunio pe fa'atasi i le vaitau o le Fagafulu pe o le Eseta fo'i.

O le Aso Lulu o le Lefulefu e mafai ona avea ma taimi o le suiga moni fa'aleagaga – a o vala'auina i tatou e le Atua mai a tatou agasala, mai a tatou ala tuai ma popolega, i se olaga fou, se alofa moni mo isi, ma se tafa mai o āta o se aso fou mo le lalolagi atoa.

va'aia i auaunaga a loane. Sa ia ta'ita'i i latou aga'i atu i le vai a o ia papatiso atu iā i latou, ma na ia fa'amalosia i latou e malaga fa'atasi ma ia i le vao – ma na ia saunia ai i latou e ulufale atu i le Nu'u na Folafolaina na sua e le Mesia, le tasi o le a ia papatiso i latou i le afi ma le Agag Pa'ia.

O le ulua'i esoto na sau mai le fa'apologaina i Aikupito. O le esoto lona lua e mai le fa'apologaina a le agasala, ma o le mafua'aga lenei e tāua ai o le papatisoga a loane o le papatisoga o le salamō. O se manatu mulimuli laua'itele i le fa'aeaina o Israaelu mai anamua ua fa'atusa i le mulumuluina fa'asauniga na faia e loane i augtu o le vai i loritana. O le la'asaga autū o le malaga a tagata Israaelu o le uia lea o le loritana ma ulufale atu i le nu'u o lo'o tafe ai le susu ma le meli. O le fa'atulagaina o ia lava e le vai lava lea, ua fa'atosiga atu e le Papatisoga o tagata agasala ina ia savali atu ai i le Nu'u na Folafolaina a le Mesia.

## FAIGA MASANI O LE FAGAFULU: NISI O ILOILOGA AOGĀ

### Tu'itu'i atu, Sā'ilī atu ma Ole Atu

Ole atu, sa'ilī atu, tu'itu'i atu (Mt 7: 7). O poloa'iga ia e tolu, e pei ona i ai, o talosaga e tolu e tatau ona faia ma le onosa'i, auaua'i ta'itasi. Ae o le a se e tatau ona tatou talosaga ai i i Atua ina ia lenei tulaga leaga ua tu'u i ai i tatou e le agasala...

Tu'itu'i. 'Aua le fiu e tu'itu'i, e o'o lava i le tulaga ua le mafaufau ai, pe afai lava e mafai. O lo'o i ai se auala e fa'amalosia ai le Atua ma fao mai lana kalasia ma iā ia, ma i lenā ala o le a fai talosaga pea ma le fa'atutuata mausalī... E ui lava e foliga mai e le o lagonaina pe te'ea fo'i e le Atua i tatou, e tatau ona tu'itu'i pea, fa'amoemoe mo

mea uma mai le Atua ae tatou te gaioi fo'i i tatou...E tatau ona aua ne'i fa'agaloina o le Atua e foa'i i taimi uma lava; o le mafaufau fa'apea o le fa'avae lea o le lotomaulalo.

O tatalo e fa'avavau ua ausia pe a...ua tatou a'oa'oina mai a tatou tatalo ma le faitauina o ni moni po'o ni upu ua tatou teuina i o tatou loto ma tatou te toe manatuaina mai lea taimi i lea taimi, a o taofiofi i tatou lava i se tulaga o le fa'amoemoe aga'i i le Atua ma fa'ailoa o tatou mana'oga iā te ia, lona uiga o le tu'uina atu lea o tatou mana'oga i lana silafaga e aunoa ma se tala. E pei o le ele'ele ua leai se suavai e fa'asusu ai ua foliga ua tauvala'au mo se timu i le fa'aali atu lea o le ele'ele ua matutū i le lagi, e fa'apea fo'i o tatou agaga pe tatou tu'uina atu o tatou mana'oga i luma o le Atua.

### O LE ATUA E FA'AILOA MAI (TALANOA MAI)

O le Koneferonisi a Epikopo sa faia i le tausaga talu ai 2020, sa fa'atulagaina lenā tausaga o le Tausaga o le Upu: O le Atua e Talanoa mai.

ma o tatou tulaga, i le natura o le tagata i le sa'ilia o le Atua i tulaga 'ese'ese uma ma le tulaga faigatā o lenei olaga, ma fa'apea ai o le Atua ma la tatou mafutaga. Atonu e aogā ae tusia lea i le āga Fa'atasitolu.

#### Le Atua le Tamā

4  
Sa folafolaina e le Ekalesia le 2020 o se Tausaga o le Upu, pe a tatou fa'alogologo i le Atua o Tautala (Fofoga) mai. O se tasi o suiga mao'e i le Ekalesia, na fa'ailoa mai i le limatefulu tausaga talu ai e le Fa'avae i le Tusitusiga Pa'ia e le Vatikano II, Dei Verbum, ua avea ma tu ma āga a le Tusi Pa'ia. Ae le'i taunu'u mai i lenā taimi o le Tusi Pa'ia sa va'ai ma faia e Katoliko ma le fa'aeteete. O se mea sa va'aia o Porotesano e āna, a o sakalameta o mea ia a Katoliko. O se mea mata'utia pe a su'esu'e i ai i le laua'itele ona o le popole i le tausalaina e le talitonuga sa matele i ai le seneturi sefululua o se gaioiga mo se faiga fou i le lalolagi i sosaiete ma aganu'u ina ia o gatasi ma talitonuga o le laloagi i nei onapo, ma sa fa'ailoa so'o pea i faife'au ma faia'oga Katoliko e fa'apotopotoga sa tete'e. O na mea uma na fa'amuta i le fa'ai'uga o le fonotaga o le Vatikano II; ma mai lenā taimi ua maua'a le Tusi Pa'ia i loto ma mafaufau Katoliko e pei o isi Kerisiano. O faitauga tuma'oti ma metitasio i le Tusi Pa'ia ua avea ma mea masani. Faitaugā Tusi Pa'ia ma vaega e a'oa'oina le Tusi Pa'ia ua tuputupu a'e i palisi. O le patipatia laua'itele o tatalo fa'atusi pa'aia i taeao ma afiafi o se va'aiga i le tele o palisi. O palisi e leai ni ositaulaga, o se sauniga fa'atusi pa'ia ua avea ma se isi auala mo tagata palisi e feiloa'l atu ai i le Ali'i. O le au faia'oga fa'atusi pa'ai Katoliko ua maua o latou nofoaga i le li'o o a'oa'oina laua'itele fa'afa'ailoga o le tusi pa'ia. O le a se mea ua tatou a'oa'o mai i le fa'alogologo i le Atua o lo'o Tautala (Fofoga) mai? Mai le Tusi Pa'ia atoa ua tatou maua ai se malamalama'aga tele iā i tatou lava

E to'atele le au faifilosofia ua manatu e mafai ona fa'aveina le i ai o le Atua i le manatu fa'anatura. Se la'iiti o le iloa o le Atua lea ua maua mai i manatu fa'anatura e mafai ona va'aia i āta 'ese'ese ma le lē manino o atua na tuputupu a'e mai talitonuga fa'apaupau anamua. Mai nei manatu o le Atua ua talanoa mai, ua momoli maia i tatou. I le Upu a le Atua ua auina maia i tatou mai le faia o fa'aaloaloga ma tatalo i nei atua e pei o Jupiter, Apolo, Hera, Mars Vulcan ma isi ua ta'ua na o atua mai le vaitau o le tuputupu a'e o agaifanua a Eleni ma Roma, sa mao'e ma lelei le alualu i luma i ni auala se tele.

I lona fa'atusatusaga, o lea ua fa'avae mautū nei o tala o le foafoaga mai le Kenese i se manatu o ni tala o le tala'aga, e mafai ona tatou fa'alogologo i ai mo ni lesona ua a'oa'o mai e uiga iā i tatou, aemaise lava pe afai o fa'atatau i le Atua O Lē Tautala (Fofoga) mai. I le seneturi e sefuluiva na aumai ai le manatu mai le Akiepikopo a Dublin e fa'apea o le Kenese 1 e lē o se tala'aga ae o se atina'e o le tala fa'asolo a Aikupito na fuafua e patipatia ai aso o le vaiaso, ma na tele ona fa'asino i tulaga i taimi nei i lō mea na tutupu i taimi ua tuana'i. Na Tautala le Atua ona i ai lea o le atulaulau e pei ona i ai le Upu a le Atua. Ua na o se tasi le sitepu mai lenei e va'aia ai le fa'amatalaga e lē o se tala'aga ua fa'apu'upu'u e le kenese o le atulaulau ae

# O LE ATUA E FA'AILOA MAI (TALANOA MAI)

o se auiliilina mai e pei oni āta o le va feagai ai i le taimi nei. O lo'o a'oa'o mai ai se lesona o le lelei ma le faipa'aga a le tamaloa ma le fafine ma le lelei laua'itele o lo'o i ai, ona o Lē na foafoaina ua fiafia i lana galuega o le foafoaga, ioe ua 'olioli tele' i le galuega fa'ai'u, o le foafoaina o le ulugali'i. Ae o uiga lelei ua susulu mai ai e ala i le alofa o Lē na Foaoaina ana foafoaga, aemaise lava mo le ulugali'i tagata. Na fuafua lelei lava e le Atua ae le'i faia i la'ua: 'la tatou faia le tagata i lo tatou fa'atusa' ma o le tala na au-mai fa'asolo ina ia fa'asoa atu ai le olioli. O le galuega a le ulugali'i o le fa'auauaina ma fa'amae'a le galuega o le foafoaga, e le na o le fa'atumulia o le 'ele'ele ina ia va'aia ua tumu i manu, ae fa'aatoatoa manu fo'i i le tu'uina atu i ai o igoa. O le su'iina ma le fa'aeteete le itū o Atamu na aumai ai e le Atua se vaega e lata i lona fatu e faia ai lana pa'aga mo ia lava. E ui i le mae'a o le pa'ū ae na sau le Atua ma le misimisialofa ma le agalelei e sa'ilili i la'ua a o lalafi i le māiasiasi ina ua la telenonoa. Na le tu'ua ai fa'apenā i la'ua e le Atua, na ia su'i ni lavalava e ufiufi ai ma fa'amafanafana ai i la'ua. O le la lē usita'i o lona uiga ua leai so la'ua nofoaga ile Fa'atoaga o le Fiafia i le filemū ma le fealofani. Ae ua le tulii i fafo ae le'i folafolaina e le Atua o le tiapolo o le a le manumalō ma le sua a le fafine o le a tali atu mo le toe suia o le tulaga ua iai nei. Ua pei o se matua alofa, fa'anoanoa ua auina atu le ulugali'i talavou ma le iloaina o le anoano o fa'afitauli ma fa'aletonu o le feagai ma i la'ua i le faigamalaga.

O le igoa o le alofa ma le fa'amagalo a o talanoa pea le Atua. I le afi mumū i le la'au talatala na avatu ai iā Mose se igoa mo le Atua. O le fa'ailoga lea ole alofa ma le alofagia, o se ulua'i vavalalata maoa'e tele, ua tu'u ai Mose i se tulaga o le a ia fa'atuatuaina ai le Atua i taimi o fa'aletonu ma le puapuagatia ma popolega o le faigamalaga atu (Esoto). Afai e leai se igoa e te fa'ailoa atu ai se tagata, ua e i se tulaga pagātia, ma le taumamao. O le fa'ailoaina o se igoa o se fa'ailoga o le fa'anaunau e tatala ma amatalia se mafutaga. O se tulaga vevesi ona o se igoa e fa'alilolilo. O se tulaga vavalalata tele e pei o se mafutaga a se tinā ma lana pepe. E le tatau ona fa'ailoaina i isi. Ina ua fai mai le leo; "O A'U O LĒ OLA, O LO'O OLA LAVA", e foliga mai o se musuā e fa'ailoa lona uiga.

Ona o le toilalo i le toafa na mafua ai ona malamalama Israel i le uiga o le Igoa. Na amata mai i le mae'a o le feagaiga i le Sinai na fa'aalia ai e Israuel ona tulaga lelei. A o aga'i mai Mose mai luga o le Mauga Pa'ia, ma aumai vaega o le feagaiga, sa maua mai tagata o sisiva fa'atamilo i se fa'atusa o le povi auro. O le gaioiga muamua lenei i le ta'amilosaga o le fefe i le tala'aga a Israuel, o se ta'amilosaga e fa ona ituaiga o le lēfa'amaoni, mulimuli mai ai ma fa'asalaga, alu atu ai i le salamō ma le fa'asaoina e le

Ali'i; o se ta'amilosaga sa fa'auau pea se'ia taunu'u i le fa'aaunu'ua. I lona mafatiaga sa 'ai'oi Mose ile ALI'I e avea atu o ia: ua na lē mafai ona tauaveina nei mea ua tutupu. Ona 'ai'oi lea se'ia va'ai i le Ali'i. Ae leai se tagata e mafai ona va'ai i le Ali'i ma ola pea. O i'ina na ia malamalama ai i le Igoa na i le Afi Mumū i le La'au Talatala, ona o le Atua ua pasia ona luma, a o ia punou i le va o ma'a ma tagi ai "O le ALI'I, o le ALI'I, o le Atua alofa mutimutivale ma le alofa fua, e telegese lona to'asā, ae tele le alofa ma le fa'amaoni. O lē tausi le alofa e o'o atu i le afe o tupulaga, o lē fa'amagalo fo'i i le amioletonu ma le solitulafono ma le agasala" (Esoto 34: 6 – 7). O le uiga lenei o le Atua ua fa'aleo mai e le Tusi Pa'ia, o lo'o fa'ailoa so'o mai ma fa'auau atu ai i le Feagaiga Fou.

## O le Alo

O le talafa'atusa sa fa'aogā e Tamā o le Ekalesia i le amata i taimi a o atia'e le uiga o le Tasitolu o lo'o aogā pea. O le au fai koneseti anamua i Eleni po'o Roma e masani ona si'i i o latou luma ni matapulepule ua vali, e fa'ailoa mai ai i le au maimoa le peresona o lo'o latou tauaveina i le tala. O nei tagata o e fa'atinoa le peresona e tasi po'o ni peresona e sili atu i le tasi. E fa'apenā, pe fa'atusa fo'i i le Tasitolu: ua tatou iloaina le tagata atua o tautala mai i peresona 'ese'ese, o matapulepule 'ese'ese.

E ala mai iā lesu ua talanoa mai ai le Atua i le tulaga fa'ata-gata, ae o le Atua alofa lava e tasi o lo'o talanoa mai. E talanoa i tagata 'ese'ese, le au agasala ma le au ao lafoga e pei o Sakaio. O se alofa laua'itele, ona e talanoa fo'i i tagata o Nu'u'ese. Ua ia taufa'osooso ma lu'itauina le tinā Foinie ma le fafine Samaria ae le'i tata'ia i la'ua e mulimuli iā te ia. Ae e pei o le Atua o le Feagaiga Tuai, e le faigofie lesu, ona e i ai taimi e faigatā ma ogaoga ai. Mai le ta'ita'i mau'oa talavou sa mana'o i le agalelei atoatoa, ona e le mafai e le kamela ona ulu atu i le mata o le nila. O le a leai fo'i se loli ma se tamaloa o le a sau ma talosaga iā te ia e fa'amasino i lona tofi. E fai so'o ma fai so'o ona ia fa'aalia le malosi mamana: o lana upu na ia avatu ai le meaalofa o le ola i le afafine o Iairo po'o Lasalo. O lana upu na ia ave'ese ai le paoa a le tiapolo na ulufia ai se tamaititi ma'i supa. Ua aumai e le fai evagelia le ogatasi ma le Atua o le Feagaiga Tuai i le fa'amatalaina le fa'amalūina o le afā ua tutusa ma le tulaga ma le fa'agaso-ologa na si'i ai e le Atua ma fa'amalū le afā i le Salamo 107:

23. O i latou o e folau i va'a i le sami,  
ē fai galuega i le vasa tele

24. O i latou ia latou te va'aia galuega a le ALI'I,  
ma ona vasega e fai i le moana.

## O LE ATUA E FA'AILOA MAI (TALANOA MAI)

25. Auā ua fetalai ane ia ma fa'atupuina le afā,  
ua laga ai ona peau.
26. E ō a'e i latou i le lagi, e toe ō ifo i lalo,  
ua liu suāvai ai o latou loto i le atuatuvale.
27. E tautevateva i latou ma tausuai pei o le tagata 'onā,  
ua fa'aumatiā fo'i o latou atamamai uma lava.
28. Ona latou alalaga atu leai le ALI'I i lo latou puapuagā;  
ua ia aumaia i latou nai o latou tīgā.
29. Ua liua e ia le afā i le malū,  
ua ta'oto iā te ia le au peau.
30. Ona latou fiafia lea, auā ua malū,  
ua ia ta'ita'iina fo'i i latou i le  
taulaga na latou loto i ai.
31. Ia viv'i atu i latou i le ALI'I ona o lona alofa,  
ma ona vavega na fai i le fanau a tagata.

Ua tatou va'ai i ai o le afā lava e tasi, o le fefe fo'i a i le lē mautonu, fa'apea fo'i le talosaga i le Ali'i, o le a'o'a'i lava e tasi i le elemene fa'apea le mapusaga lava e tasi na lagoina e ali'i o le va'a. I le tala a loane, o le taunu'uga vave e tutusa i le malū sa latou mo'omo'o i ai (Iaone 6: 21).

O le isi auiliiliga manaia tele e mafai ona tatou maitauina auala na tautala ai lesu. E masani ona fa'ailoa so'o mai i Evagelia o tautala i ni uiga e fa'alua ni fa'atusatusaga ua ia soloia 'ese ai le fa'auigaga fa'aletagata. O taimi ia ta'itasi ua ia toe fo'i mai i se fa'auigaga sesē i le uiga loloto moni a Tusitusiga Pa'ia.

O ē ua fa'atasia e le Atua, 'aua le fa'ate'ate'a'eseina e le tagata. (Mk 10: 9)

Ua faia le sapati mo tagata, ae lē faia le tagata mo le sapati (2: 27)

Ua outou fa'aleaogaina ai le afioga a le Atua iā outou uputu'u (7: 13)

Inā avatu ia o mea a Kaisara iā Kaisara; ia avatu fo'i mea a le Atua i le Atua (12: 17)

I le tulaga muamua na soloia e lesu le fa'atagaga 'mo le fa'ama'a'a o latou loto' i ulugali'i tete'a, ma toe fo'i i le tala masani o le faia o le tagata o se tamaloa ma le fafine. I le faiga lona lua sa ia toe fo'i i le mafua'aga o le Sapati i le tala o le foafoaga. O lona tolu sa soloia se faiga o le tu masani fa'aletagata o le toe fo'i i le fa'avae o le poloa'iga lona fa, o le poloa'iga muamua sa fa'apipi'i i ai se folafolaga, o se poloa'iga e uiga i tulaga lelei o aiga. E le ua na o ta'alo i upu lesu, ona o taimi ia ta'itasi ua ia tu'u 'ese ai fa'auigaga e le moni ina ia fo'i i fa'auigaga ua fufuina e le tusi tala pa'ia, le fua o le metitasio e totino toe vavalalata.

Atonu o le taimi sili le maitauina na fa'atonutonu ai e lesu o le Tusi Pa'ia o le poloa'iga o le alofa. I se loia sa fesili sa ia ta'utino mai o le Poloa'iga Sili o le Sherma', o le poloa'iga sili a lutaia i le Teuteronome, 'ia e alofa atu i le Ali'i lou Atua ma lou loto atoa, ma lou agaga atoa, ma lou malosi atoa'. Sa ia fa'auau ma fa'aogaina le fa'avae o fa'auigaga e - rapi o fa'aliliuga e so'oso'o ai isi poloa'iga: 'e lua faiatauga o le tusi pa'ia o lo'o maua i ai upu lava ia e ao ona fa'auigaina fa'atasi'. Pau le isi faiatauga mai le Tusi Pa'ia Eperu o lo'o maua ai 'e te alofa atu' e maua i ai ma le tu'usa'o a Levitiko 19: 18, 'e te alofa atu i lē lua te tua'oi ia pei o 'oe lava iā te 'oe'.

## GALUEGA A LE AU APOSETOLO

### O le Tu'uina o Peteru ma loane i le Fale Puipui

<sup>1</sup> O lo'o o tautala atu i lā'ua i le nu'u, ona tutū mai lea iā te i lā'ua o ositaulaga, ma le ta'ita'i o le 'au leoleo o le malumalu, atoa ma satukato. <sup>2</sup> Ua tīgā i latou ona ua la a'o'a' atu i le nu'u, inā tala'i atu le toetū mai o lesu nai ē ua otī. <sup>3</sup> Ua pupu'e iā te i lā'ua, ma tu'u atu i le fale puipui se'ia o'o i le taeao; auā ua afiafi lava. <sup>4</sup> E toatele o ē na fa'alogologo ile upu, ua fa'atuatua i latou; o le faiataofa'i fo'i o tagata po ua lima afe. <sup>5</sup> Ua o'o i le taeao, ona fa'apotopotoina ai lea i Ierusalem o latou ali'i, ma le 'au toeaina, ma le 'au tusi'upu, <sup>6</sup> ma Ana le ositaulaga sili, ma Kaifafa, ma loane, ma Alesana atoa uma lava ma le aiga o

le au ositaulaga sili.<sup>7</sup> Ua latou tu'u iā te i lā'ua i totonu, ona latou fesili mai ai lea, "O le a ea le mana, po o le igoa o ai, na ouluu fai ai lenei mea?"

<sup>8</sup> Ona fai atu lea o Peteru iā te i latou, ua tumu o ia i le Agaga Pa'ia, "O outou ali'i o le nu'u, ma toeaina o Israelu, <sup>9</sup> āfai e fa'amasonina i ma'ua i lenei aso ile alofa ua faia i le tagata ma'i, po o le a mālōlō ai o ia; <sup>10</sup> ia iloa e outou uma, atoa ma le nu'u uma o Israelu, ole suafa o lesu Keriso o le Nasareta, o lē na fa'asatauroina e outou, o lē ua toe fa'atūina e le Atua nai e ua otī, o ia lava ua tu mai ai lenei tagata ua

# GALUEGA A LE AU APOSETOLO

## O le Tu'uina o Peteru ma loane i le Fale Puipui

mālōlō i o outou luma.<sup>11</sup> O Iesu lea sa fai mai ai le Tusi:

*'O le ma'a lenei na fa'alēaogaina e  
outou tufuga fai fale,  
Ua avea o ia ma ma'a tulimanu  
Aupitoaluga.'*

<sup>12</sup> "E leai fo'i se tasi ua i ai le ola; e leai lava se isi igoa i lalo o le lagī ua foa'iina mai i tagata e mafaia ona fa'aolaina ai o i tatou."<sup>13</sup> Ua va'ai i latou i le loto tele o Peteru ma loane, ua iloa fo'i o tagata e le'i a'oa'oina i lā'ua ma le vālea, ua latou ofo ai; ua latou iloa fo'i o i lā'ua sa latou fa'atasi ma lesu.<sup>14</sup> Ua iloa atu fo'i e i latou le tagata ua fa'amālōlōina ua tutū fa'atasi ma i lā'ua, ona le mautali ai lea o i latou.<sup>15</sup> Ua fai mai iā te i lā'ua e ō 'ese ia i le fono; ona fetaultatala'i lea o i latou,<sup>16</sup> ua fa'apea, "Se a se mea tatou te faia i nei tagata? Auā ua matuā iloa e i latou e nonofo i Ierusalem uma lava ua faia lava e i lā'ua le fa'ailogā sili; e lē mafai fo'i ona tatou fa'afiti i ai.<sup>17</sup> Ae peita'i ina ne'i alualu ona salalau lea i le nu'u, ia tatou matuā fa'amata'u atu iā te i lā'ua, ia sōia lava le toe tautala i se tagata i lenā igoa."

<sup>18</sup> Ua 'a'ami atu iā te i lā'ua, ona vavao lea iā te i lā'ua, 'aua ne'i tautala atu pe a'oa'o atu i le igoa o lesu.<sup>19</sup> A ua tali atu Peteru ma loane, 'ua fa'apea atu iā te i latou, "Inā filifili ia outou, pe tonu i luma o le Atua, ona ma fa'alogō atu iā te outou, pe ma te fa'alogō i le Atua.<sup>20</sup> Auā ma te lē mafai ona lē tautala i mea ua ma va'ai i ai ma fa'alogō i ai."<sup>21</sup> Ua latou toe fa'amata'u mai iā te i lā'ua, ona tu'u lea o i lā'ua e ō, ua lē maua e i latou se mea e fa'asalaina ai i lā'ua, ona o le nu'u; auā ua viv'i tagata uma lava i le Atua, ona o le mea ua faia.<sup>22</sup> Auā ua fagafulu tausaga ma ona tupu o le tagata sa fai i ai lenā fa'ailogā ua mālōlō ai.

### 4:1 – 22 O le fetauiga a le pule o le malumalu ma aposetolo i le fesili po'o ai le pule

O le va'aiga a latou sa mulimuli iā lesu o a'oa'o le motu o tagata i le malumalu na popole ai ta'ita'i o le malumalu. E le gata o nei tagata Kalilaia ua faoa fa'amalosio latou pule e a'oa'o ai tagata, ua latou folafolaina iā lesu le "toetū mai le otī," mo le 'au Satukaio, o le tasi lea o a'oa'oga pepelo a le 'au Farasaio. O le mau taofi a le au Sakutao e tasi le mau moni ua maua i a'oa'oga a le Penetakuka (Tusi muamua e lima a le Feagaiga Tuai), ma e leai ni a'oa'oga e uiga i le ola e fa'avavau po'o le toetū i na tusi e lima (va'ai Luka 20: 27 – 40).

Ina ua potopoto le au ositalulaga sili ma toea'ina ma tusi upu, ua latou toe faia le fesili na latou faia muamua ma lesu ina ua ia tulisea tagata fa'atau oloa ma

fa'aauaua'oa'oga i aso ta'itasi i le malumalu (Luka 20: 1 8), ua fesiligia le pule. Ae o le taimi lenei o la latou fesili e uiga i le mana na fa'amaloloina ai le tagata pipili: "o le a ea le mana, po o le igoa o ai, na oulua fai ai lenei mea?"<sup>9v.7</sup> O le tulaga lava lea e tasi na aumai e le fa'amalologa ma na tautala ai Peteru i lana tautalaga talu ai (3: 12 – 13). Ma o le tali e pei o lea. O le fa'amalologa o se gaioiga a le Atua na faia i le suafa o Iesu; o le fa'amalologa ua fa'ailoa mai ai o le fa'amasinoga a le au tusi upu, taoeaina ma ositalulaga (o lesu na solitulafono ma ua tatau ona fa'asala i le otī) na fa'aleaogāina e le "fa'amasinoga maualuga" a le Atua, e pei ona fa'amausalīina e le toetū a lesu.

O le fa'amanaina o Peteru e le agaga pa'ia na fa'ataunu'uina ai folafolaga a lesu i ona so'o i le Luka 12: 11 – 12. Ina ia māua lelei e tagata o lenei manumālo o le pule ma le mana o le Atua e sili atu i lo le pule fa'alalo nei, na ta'ua e Pateru se Salamo e fiafia le Ekalesia e patipatia ai gaioiga a le Atua i le maliu ma le toetū o lesu (va'ai Luka 20: 17 ma le 1 Peteru 2: 7). I le toe fa'apu o le Salamo 118: 22, na fai atu Peteru i le motu o tagata, "O ia ' o le ma'a na lafoa'ia e outou, tufuga fai fale, ua fai lea ma ma'a tulimanu aupitoaluga." I le fa'auigaina o le Salamo 118, o le ma'a na lafoa'ia ua fa'asino lea iā Israuelu, na lafoa'ia e malosi fa'atupu ae na fa'asaoina e le Atua, o le a ia fa'aogaina o se ma'a tulimanu. O lenei fuaiupu ua fa'aogaina lelei o se fa'auigaina (*pesher*) Kerisiano ona e le gata ua talafeagai i le patipatia o le maliu ma le toetū o lesu, ae ua aumaia fo'i le fa'atusa o le i'uga o taimi o le malumalu na fa'auigaina o se fa'apotopotoga Kerisiano.

E lē gata i lea, o le sini o le salamo – o le mana o le Atua e lavea'ia e sili atu i lo le malosi fa'atupu i lalo nei – ua maua ai se fa'auigaga o upu a Peteru i le sini o le fa'amalologa/lavea'i. O le upu Eleni mo le "fa'amalolo" ma le "lavea'i" i le fuaiupu 9 ma le 12 o le sōzō, e mafai ona fa'auigaina i so'o se ituaiga o lavea'i, mai le fa'amalologa fa'aletono i le fa'aolataga mulimuli i le manatu i le maliu, fa'amasinoga ma le taunu'uga mulimuli o le agaga ma le tagata. I le fuaiupu 9 o lo'o fa'asino maia le fa'amalologa fa'aletono o le ma'i supa, ae i le fuaiupu 12 o lo'o fa'asino lea i le fa'aolataga mulimuli. O le mea lea o le fa'amaloloina o le tagata na fanau mai e pipili ua avea ma fa'ailogā e le gata o se fa'ailogā o le toe fuata'iina o Israuelu ae fa'apea le fa'aolataga atoa o latou uma na talitonu: "E leai fo'i se tasi ua i ai le ola; e leai lava se isi igoa i lalo o le lagī ua foa'iina mai i tagata e mafaia ona fa'aolaina ai o i tatou"

E ui o lenā fuaiupu o nisi o taimi e fa'aoga i le uiga 'ese o lesu i le va'aiga a le tele o iutūaiga, o se isi faiga masalo o lo'o galue i'inei. Mo se laua'itele ua masani i le mau a Ta'ita'i Rom i le suafa sōtēr ("Fa'aola"), o le ta'ua o le sōtēria ("fa'aolataga") ua aumai ai se 'ese'esega i le va o le pule fa'alemalō ma le ta'ita'i ma le malosi mamana o

## GALUEGA A LE AU APOSETOLO

### O le Tu'uina o Peteru ma Ioane i le Fale Puipui

Io'o galue e ala iā Iesu. E pei ona i ai i le Salamo 118, o le pule ma le malosi moni e lē sau mai malō tetele o le lalolagi ae mai le mana a le Atua, o lo'o fa'atino nei i le suafa o le Ali'i Iesu.

Ina ua fa'atonuina e le au ositaulaga sili ma toeaina ma le au tusi upu le 'au apostolo "ia sōia lava le toe tautala i se tasi tagata i lenā igoa" (v.17), ae fai mai Peteru ma Ioane, "Ina filifili ia outou pe tonu i luma o le Atua, ona ma fa'alogi atu iā te outou, pe ma te fa'alogi i le Atua." O se ta'utinoga manino lelei lava o nei ta'ita'i fa'alelotu ua leai se pule sa latou u'uina. O āga a le au tusi upu ma

toeaina ma ositaulaga ua fa'ailoa mai ai o nei tagata ua fa'amuamua ona taumafai e taofiofi le pule i lo le auauna atu i le pule a le Atua. O le fa'amaloloina o le pipili i le faitoto'a o le malumalu "o se fa'ailogi mata'u'tia" sa latou maitauina, ae sa taumafai e lē fa'atāuina. Ua fa'amamafa mai e Luka le natura laua'itele o lenei mea na tupu i lana fa'aupuga fa'ai'u: "Auā ua fagafulu tausaga ma ona tupu o le tagata sa fai i ai lenā fa'ailogi ua mālōlō ai ( o le mea lea ua lauiloa e tagata e o mai so'o ai i le Malumalu i le Mauga.....fa'aauau peia....

## SAGATO CYRIL MA METHODIUS (Monike (maliu 869) ma Epikopo (maliu 884)

Ona o le la tamā o se ofisa maualuga i se vaegā fitafita a Eleni sa nofoia e tagata Slavs, o nei 'au uso e to'alua na i'u ona avea ma misionare, faia'oga ma sulufaga o tagata Slavic. I le mae'a ai oni a'oa'oga maoa'e, o Sililo (na fa'aigoaina Kosedatino se'ia avea ma monike ae le'i maliu) na musu e tauavea se tofiga kovana a se itumalō e le pei o lona uso na talia i le li'o o tagata e tautala ile gagana Slavic. Sa ia ulufale atu i se monaseli le nofoaga na avea ai lona uso ma monike i le mae'a o nai tausaga a o iai i se tofi fa'alemalō.

O se suiga tele na tupu i o la olaga ina ua talosaga le ta'ita'i o Moravia (o Slovakia i aso nei) mo le tuto'atasi mai pulega a Siamani ma sa latou lava pulega fa'akalesia ( latou faife'au ma sauniga). O Cyril ma Methodius na amatalia le galuega.

O le galuega muamua a Cyril o le fa'avaeina lea o ni mata'itisi, masalo o lo'o fa'aoga lava i taimi nei i sauniga i Yugoslavia. O latou sa mulimuli iā te ia na masalomia na latou amatalia ona fa'avaeina mata'itisi ua ta'ua Cyrillic (mo se fa'ata'ita'iga o Lusia i aso nei) mai mata'itisi lapopo'a Eleni. Fa'atasi ai na latou fa'aliliuina Evagelia, o Salamo, Paulo ma tusi fa'asauniga i le gagana Slavic, ma tusia ni sauniga i le gagana Slavic.

O lena fa'aogaina sa'oloto o le gagana i a'oa'oga na mafua ai le tete'e mai ositaulaga Siamani. Na musu le epikopo e fa'au'u epikopo ma faife'au Slavic, ma na mafua ai ona apili Cyril i Roma. I lana asiasiga i Roma, sa mua ai le fiafia ina ua fa'amaonia e Pope Adrian II la latou sauniga fou. O Cyril ua leva ona le toe savali, ma na maliu i Roma i le 50 o aso talu ona ia fa'aogaina le veli fa'amonike.



Sa fa'aauau pea e Methodius le galuega tala'i mo le 16 tausaga. Sa avea o ia ma sui o le Pope mo tagata Slavic uma, o se epikopo na fa'au'uina ona ave lea i ai ma se pule'aga ua leva ( o aso nei o Yugoalvis). Ina ua ave'esea le tele o le latou teritori ma le latou pulega, o Epikopo uma i Bavarian na tete'e i ni tu'ua'iga malolosi ia Methodius. O lona i'uga, o le Tupu o Siamani o Emperor Louis na fa'aunu'ua Methodius mo le tolu tausaga. Na toe tatala mai e Pope Ioane VIII.

O le Ituigasā sa le fiafia lava ma na fa'auau la latou tu'ua'iga, ma o Methodius na alu i Roma e tali atu i tu'ua'iga o le faia o a'oa'o sesē ma tumau pea lona fa'aogaina o le gagana Slavic. Na toe fa'amaonia lona sa'o.

Fai mai le tala o se gaioiga ua pei o se fa'ama'i fiva, na fa'aliliu ai e Methodius le Tusi Pa'ia atoa i le gagana Slavic i le valu masina. Na maliu o ia i le aso Lua o le Vaiaso Pa'ia, a o si'osi'omia o ia e ana so'o, i lana malumalu fa'aepikopo.

O le tete'e sa fa'auau pea i le uma o lona maliu, ma o galuega a le 'au uso i Moravia na mutaina ma o la so'o na fa'ata'ape'apeina. Ae o le fa'ate'aina sa i ai lona a'afiaga o le fa'asalalauina o le galuega fa'aleagaga, sauniga, ma aganu'u a le 'au uso i atunu'u o Bulgaria, Bohemia ma Polani i Saute. O le 'au lagolago mai Moravia, ae maise le au fa'amamaluina e Katoliko Czecks, Crotians, o Orthodox Serbia ma Bulgarians, o Cyril ma Methodius ua talafeagai lelei le puipua o le fa'anaunau ua leva mo le tu'u fa'atasia o Sasa'e ma Sisifo

# E FA'AMAGALO PE LĒ FA'AMAGALOA

O le isi finauga na tula'i mai i le va feagai ai i le fa'amagaloga e le Ekalesia ma le fa'amagaloga e le Atua. E masani lava o ta'ita'i o le Ekalesia e talitonu o iā latou le malosi'aga e 'saisai ma tatala' ma o latou ua fa'aleleia ma le Ekalesia ua fa'amagaloina fo'i e le Atua. O le tele o epikopo e le'i fuaina e fa'apea o la latou fa'amagaloina o latou ua salamō e mafua ai le fa'amagaloga mamana, ae o le fa'amagaloga a le Atua e masani ona sau iā i latou ua liliu 'ese mai le agasala ma fa'aleleia o latou ala, ma ua folafolaina e le Ekalesia o latou ua fa'amagaloina e le Atua ina ua mautinoa ua suia i latou. O le fa'aleleiga ma le Ekalesia o se fa'ailogia o le fa'aleleiga ma le Atua ua uma ona fa'ataunu'u, ona o suiga va'aia ua molimauina i le olaga o lē ua salamō.

I le tausaga 313 na muta ai le fa'asauāina o le Ekalesia i se feagaiga na malilie i ai ma sainia i Milan. E sili atu ma le sefulu tausaga na mulimuli mai ai na fa'avae ai le Fonotaga a Naisia i le tausaga 325 ma na fa'amausalī ai a'oa'ooga ma le fa'atinoga o le fa'amagaloga.

- le ioينا e epikopo o le manatu i se salamō e tasi i le mae'a o le papatisoga
- Na latou fa'amausalīina le tulaga fa'atulafonoina o le fa'amagaloina o latou na faia ni agasala matuiā ma le mamafa mulimuli mai ai se taimi o togisala laua'itele.
- Ua latou fa'ailoa mai, afai o le a maliu se tasi ma talosaga mo le komunio, o le epikopo e tatau ona su'esu'e le tulaga ma avatu le fa'atagaga, e le afaina po'o ai ua talosaga mai.

I le seneturi fa, o epikopo na tu'uina i ai le aiā tatau e avea ai ma fa'amasino i mataupu tautulafono fa'alemalō ma o a latou fa'ai'uga sa fa'amalosia fa'letulafono. O le agasala, sa ulua'i mafaufauina o le fa'aleagaina o le mafutaga o le alofa ma fa'atuatuaga i le fa'apotopotoga ma le solia o le feagaiga ma le faiā ma le Atua, ua amata ona malamalamaina i tulaga fa'alekulafono ua fa'auigaina o le solia o se Tulafono mamana po'o fa'aekalesa. O le salamō ua va'aia o se fa'asalaga mo le soliga Tulafono i lo le suia o le loto. O Tulafono fa'atonutonu nei na maua ai le malosi'aga a le Tulafono a le Ekalesia po'o le kanone ma fa'asologa mo le fa'amagaloga o agasala na ta'ua o togisala fa'akanone.

Sa i ai ni suiga na faia fa'atasi i le telosia o le agasala ma le fa'amagaloga. I le Ekalesia i aso anamua sa va'aia e Tamā se fa'agasologa o le salamō o se uiga ua ave'eesina ai le agasala ma lē ua salamō ma ua fa'amagaloina e le Atua. O Tamā na mulimuli mai na faia se suiga fa'atelosia ma sa talanoa mai i le gaioiga o le togisala o se mea tatau mo le fa'amagaloga, sa faia i le fa'atinoga mulimuli o le fa'aleleiga.

E 'ese mai ai ma agasala mamafa o le aposetata, le tausiga o fa'aipoipoiga ma le fasioti tagata, sa i ai le 'ese'esega o manantu e uiga i isi agasala ua vala'auina mo togisala fa'alaua'itele, sa malamalamaina i telosia a Kerisiano anamua o se auala o le amio lelei e toe ta'ita'iina ai le tagata i le olaga o le alofa mo le Atua ma le auuanaga i isi. E ao ona manatuaina o le tele o Kerisiano masani e le'i mana'omia lenei faiga. O latou sa mana'omia, e ui i lea, sa va'aia le togisala e mata'utia ma o se mea e alo'ese mai ai.

- E masani o lē ua agasala e alu i le epikopo ma fesiligia po'o le a se mea latou te faia ina ia fa'amagaloina.
  - ⇒ E filifili le epikopo pe ua mamafa tele le agasala e tatau ai ona faia se togisala fa'alaua'itele ma, afai o lea, na te avatua i lea tagata ni galuega talafeagai e fai.
- lē ua agasala ua tusia i le Ituaiga o le au togisala
  - ⇒ Ua vavae'ese mai ai i latou mai le fa'apotopotoga ma le mafai ai e i latou ona talia le Eukalisitia.
  - ⇒ Mo vaiaso ua lautogia, mo sina masina po'o tausaga fo'i, latou te faia a latou togi sala ma va'ava'ai e isi suli o le fa'apotopotoga, o latou fo'i e faufautua i ai ma tatalo mo latou.
- Mulimuli lava o le tagata ua salamō ua toe fa'aulufale mai i le fa'apotopotoga i se sauniga laua'itele e mana'omia ai i latou e lafoa'i ai a latou agasala, talosaga mo le alofa o le Atua ma ia fa'amagaloina.
  - ⇒ Ua toe fa'aulufale e le epikopo i latou i se sauniga ua a'afia ai le fa'aloaloa o lima, ma i isi fa'apotopotoga, o le fa'au'uina i le suā'u'u.
  - ⇒ I nei gaioiga sa malamalamaina e fa'ailoa mai ai le fa'amagaloga o agasala ma le taliaina o le Agaga Pa'ia.

E ui o se sauniga tāua ma le mau'oa, o lona faiga ma le tulaga ile Ekalesia e le'i umi. Sa faigatā toe 'inainā. E masani o latou sa faia ni agasala matuiā, ma sa tatau ona faia ni togisala, sa tolotolo i tua le mauaina o le fa'amagaloga se'ia lu'iina i latou e le moni o le oti. I le seneturi fa, e o'o lava ina ua taliaina e se tagata le fa'amagaloga, o tu'utu'uga sa tatau ona fa'ata'atitia e a'afia ai i latou i le olaga atoa(fa'ata'ita'iga, e le mafai ona fa'aipoipo, e le mafai fo'i ona a'afia i ni fetaia'iga fa'aulugali'i ma isi pe afai ua uma ona fa'aipoipo pe e le mafai ona tauaveina se tofiga fa'alemalō po'o se tofiga fa'alelotu). Mo mafua'aga lava ia e to'atele tagata, ua a'afia ai ma le Ta'ita'i Roma o Kosestatino, sa tolopoina lona papatisoina se'ia matua pe latalata ina oti.

O le tagata masani, e ui i lea, e le oni tagata agasala tetele ma e sa'ilī fa'amagaloga e ala i tatalo, limafoa'i ma le 'au ai i le sauniga o le Eukalisitia....fa'aauau pea.....

# O LE PESE A LE ‘AU’AUNA

## O LE ASIASIGA

Mo Maria, ina ia malamalama i lona aiga ua matua ua to o ia o se vala’aulia tatau e ‘au’aura atu ai iā te ia. O le tatalo a Maria ‘Fa’auta o le auauna a le Ali’i’, i se alagatatau o se faiga ua o gatasi. I le taimi lava lea e tasi o ia o le auauna a le Atua ma lana tala lelei, ma le auauna a ona tuā’oi. Ua le gata ua tatou maua Maria i le fale o Sakaria ma Elisapeta i le a’ai o Ain Karem, ae i Kana fo’i e fesoasoani i tapenaga o le fale ma le umukuka. E fia taimi e tatau ai ona ia fa’alogoina se vala’aulia a le kalasia a le Ali’i auauna atu iā i latou ua mana’omia lana fesoasoani?

Na feiloa’i atu Maria ia Elisapeta ma Sakaria o se auauna a le Atua. Na sau e auauna atu iā i la’ua ma e le gata i lenā, na sau e aumai iā i la’ua le fe’au fiafia ma le filemū. Na alu atu i le fale o Sakaria ma feiloa’i atu iā Elisapeta. O lana fa’afeiloa’iga e le gata o se fa’aloalo, po’o se fiafiaga i le feiloa’i atu i se fa’auō ua leva. Sa feiloa’i atu o ia o le afafine a Siona, fa’atasi ai ma fa’amanuiaga o tausaga ua matua ma le pese o le fa’amoemoe: ‘Shalom – Filemū’. O se fa’amanuiaga, ma i lena taimi o le fa’ataunu’uga o le fa’amoemoe a Israelu. Ua ia tauave i lona manava le Aloali’i o le Filemū, o lē ua na tau’ave o tatou tino fa’aletagata ina ia susulu mai ai lona filemū ma le fiafia i loto o tagata uma. Ua ia sau ina ia fa’avae se malō o le filemū ma le fai meatonu. O le sau a Maria ma lana fa’afeiloa’iga o fa’ailoga ia o le sau a le Ali’i ma ana fa’amanuiaga.

I o tatou tu masani sili, o le feiloa’iga i le va o Kerisiano o le vivi’i i le Atua ma le feofoofoa’i o fa’amanuiaga. Atonu e mafai, e tatou lava, ona toe mauaina le uiga o le feiloa’iga a Kerisiano i o tatou lava aiga ma uō. E ‘ese le matagofie o fa’afeiloa’iga anamua ‘la Vi’ia lesu Keriso’, po’o, e pei ona fa’alogoina i vaega uma i Italia le mea sa galue ai Alphonsus: la Vi’ia lesu ma Maria’ – ma le tali – ‘Vi’ia e fa’avavau’. Aiseā ua mou atu ai lenei tu masani matagofie? Atonu ua fai so’o ma mamalu tele. E mana’omia ona tatou toe fa’afou pe fa’apefea ona vivi’i le Atua ma fa’amanuia le tasi i le isi i ni auala e sili atu. E o’o lava i se ‘fa’atalofa’ fa’atauvā’ a mafai ona avea ma tatalo ma se fa’amanuiaga.

O tusitusiga fa’atusi pa’ia ua tatou manatua ai le fa’afeiloa’iga a Maria o se tatalo ma se fa’amanuiaga mata’utia. Ina ua fa’alogo mai Elisapeta i le fa’afeiloa’iga a Maria, na osooso le pepe i lona manava. E ala iā Maria, o lē na filifilia e saunia le ala ole Ali’i ua sau ma feiloa’i ma lesu. O lana tali o le fa’aeaina ma le olioli, o le fa’ailoga o le filemū ma le fiafia i le vaitau fa’amesia.

E pei ona gaioi Ioane i le fiafia, o Elisapeta fo’i ia ua fa’apa’iaina atoatoa i le fa’afeiloa’iga a Maria. ‘Ona fa’atumulia lea o Elisapeta e le Agaga Pa’ia ma ua alaga leo tele atu, “la fa’amanuia le Atua iā te ‘oe i fafine uma ma lana fa’amanuiaga i le fua o lou Alo”. I lenā lava taimi, na talia ai e Elisapeta le Agaga Pa’ia o lē na fa’aosofaina perofeta ma na ia mauaina ai le uiga loloto o le asiasiga a Maria. O lana tali o se fa’amanuiaga ma le fa’afetai ona o mea ua faia e le Atua mo Maria, o se fafine mao’e tele o le a maua i ai e augatupulaga se Eva fou, ua aumaia iā i tatou le Atamu fou, o lesu Keriso, le Fa’aoa o tagata uma. O taimi uma tatou te lauina ai le Si’oualofa Maria, ua tatou au fa’atasi ma agelu ma Elisapeta i le vivi’i atu mo mea uma lava na faia e le Atua ia Maria.

Pe fa’apefea lenei mea, ina ua sau le tinā o lo’u Ali’i iā te a’u nei?” O Ioane le Papatiso na fa’apea mai e le talafeaga mo ia ona talatala noanoa o se’evae a lesu. Ma le ofo tele sa ia fesili atu ai, ‘E ao ona e papatisoina mai o a’u, a e maliu mai ‘ea oe iā te a’u?’ (Mataio 3: 14). Ma le agaga maualalo lava lea na manatu Elisapeta pe fa’apefea ona tupu lenei ua sau le tinā a lona Ali’i i lona fale. O le sau o le auauna a le Ali’i ua mafai ona fa’aulufale mai i le agamaualalo. O le sau o Maria ua fa’aosofaina ai le fa’aloalo ma le maofa: ia fa’amanuia le ua afio mai i le suafa o le Ali’i.

I le fale o le Asiasiga, ua tatou iloa ai le ta’uta’uina ole fa’atuatua, o se tatalo fefaf’aso’i. E toalima tagata o lo’o i ai: o le Upu e fa’avavau ua avea ma tagata i le manava o le Taupou, o lona tinā ua aumaia le punavai o fa’amanuiaga ma le filemū, Elisapeta, ua fa’atumulia e le Agaga Pa’ia, le silisili i perofeta uma ua saunia le sau o Keriso, Ioane le Papatiso ma Sakalia, o se tagata e le tautala ae pupula mata ma le loto. O lana lē leoa o se ‘au ai moni lea, fa’alogologo ma le ‘au ai. O le seleseloga o le a avea ma ana pese: la vi’ia le Atua o Israuelu’.

O aiga Kerisiano uma ma fa’apotopotoga ua vala’auina ina ia avea ma fale o tatalo ma fa’apea le punavai o le olioli mo le to’atele. O tatou uma o le a maua le fesoasoani e talatala ai fa’ailoga o taimi ma iloaina ai le i ai pea o le Ali’i pe a tatou fa’asoa la tatou fa’atuatua ma le fa’afetai ma ‘au atu i vi’ivi’iga o le Atua.

*Le Ali’i lesu Keriso, matou te fa’afetai atu fa’atasi ma Elisapeta, Ioane ma Sakalia*

*Mo lau asiasiga i le latou fale;*

*Ma matou te fa’afetai atu iā te oe mo taimi uma na e asiasi mai*

# O LE PESE A LE ‘AU’AUNA

## O LE ASIASIGA

*ai i matou i o matou olaga ma o matou aiga.*

*Matou te fa’afetai atu, le Tamā Mamana, mo le sau*

*O le malō sili atu, o lou Alo pele e to’atasi na avea ma tagata mo matou.*

*O ia o lau meaalofa ae e ala fo’i i lau kalasia le meaalofa o Maria*

*iā i matou. Tu’uina mai iā i matou e pei o Maria, ia mafai ai fo’i*

*ona matou aumaia lesu, o ana fa’amanuiaga ma lona filemū, i o matou uō*

*ma latou uma matou te feiloa’i atu i ai.*

*Matou te fa’afetai atu, Maria, ma tagata uma lava ma a latou fale*

*Ua e aumaia i ai le fa’amanuiaga ma le filemū a Keriso.*

*Fa’amanuia iā i matou i lau fa’afeiloa’iga, ‘Shalom’,*

*Ma tatalo mo i matou ina ia matou va’ai toto’ā i fa’ailoga e tele*

*i le sau o Keriso i o matou olaga. Amene.*

## EVAGELIA A MAREKO: O SE ĀTA FA’ATA’ITA’I MANUIA

O le aso Sa o le Atevetu ua fa’ailoga ai le amataga ole Tausaga B, e faitauina ai le Evagelia a Mareko.

### Sa’iliga o le tusi evagelia

O fea o i ai Mareko? ‘I Tausaga B Uma’ ina ua amata polokalame o le tausaga e masani ona tufatufa ai polokalame o lo’o fa’atulaga mai ai faitauga o le Tausaga. I le fa’ava’ā o lo’o tusi ai ‘Tausaga o Mareko’, ae o le Evagelia e lē a’afia i faitauga i aso Sa mulimuli mai i le aso Sa lona lua o le Atevetu se’ia taunu’u i taimi masani. ‘O Fea Mareko?’ – i le va o Mataio ma Luka’ po’o ua misi atoa lava, e le’i faia le Kilisimasi...ona mou malie atu lea o Mareko mai le Fagafulu i le Penetekoso. Vaganā mo aso Sa muamua e lua o le Fagafulu, ma le Vaiaso Pa’ia, ua ufitia fo’i le leo o le tusi evagelia e Ioane. O Mareko o lona umi ua na o le afa o isi Evagelia.

Ina ua fa’aogā e Mataio ma Luka Mareko o se āta fa’ata’ita’i mo la Evagelia, sa fuafuaina e fa’aleaogāina

lona leo. Ona o le fa’ailoaina atu o le olaga o se ‘ali’i ta’uta’ua’ e mana’omia le fa’amatalaina o tala’aga ma le amataga o le aiga, le fanau mai, ma ni ulua’i va’aina o le tamaititi na fuafuaina mo se tulaga lauiloa, ma ia Mataio ma Luka na fa’ailoaina mai le vaega lea na misi. E tofu lava le tusi evagelia ma lana fa’amatatalaga i le tala o le fanau mai o lesu. Sa fa’alaua’itele fo’i e Mataio ma Luka fa’ata’ita’iga pupu’u a Mareko i a’oa’oga a lesu e pei o tala tāua o Fa’amanuiaga (Mataio 5: 3- 12; Lk 6: 20 – 23), o le Tatalo a le Ali’i (Mt. 6: 9 – 13; Lk 11: 2 – 4) ma fa’ata’oto matagofie e pei o le Samaria Agalelei (Lk 10: 29 – 37). O le i’uga e seāseā i Kerisiano ona i ai ni fa’amaumaua o fa’amatatalaga a Mareko. Ona e sili atu ma le 90 pasene o ana tusitusiga o lo’o maua i isi, ua foliga mai ai o Mareko ua na o se tusitusiga e feso’ota’i ai i lo se ulua’i kopi o ia ituaiga o tusitusiga. E le o aumaia e Mareko se tala e uiga

iā te ia lava po’o ana galuega, e le pei o Luka 1: 1 – 4 ma Ioane 20: 30 – 31 o lo’o talanoa mai i la’ua i le ‘au faitau. O lo’o la’ua tusi mai e fa’amausalī le fa’atuatuaga Kerisiano. O lo’o finau mai Luka o lana fa’amatatalaga o le a maua i ai se tala e sili atu le mausalī ma le atoatoa i lo isi. O le lē lava o le gagana Eleni a Mareko fa’atasi ai ma isi vaega ua amata fa’apea ‘ma i le taimi nei’ ua atagia mai ai se tusi tala e le lava le a’oa’oga i mataupu tau tusitusi e pei o Luka. O tu masani o le fa’ai’ui’u o le seneturi muamua na fa’ailoa ai se tasi na fa’atasi ma Mareko i le misiona a Paulo (Kolose 4: 10; Timoteo 4: 11), o e na feso’ota’i ma Peteru i Roma (1 Peteru 5: 13). O Papias, le epikopo a Hierapolis (c.130 CE), na molimau o Mareko na tusitusia mea sa ia fa’alogo i ai mai iā Peteru ua toeaina i Roma. O le mafuaga lenā o le auala ua fa’aoa ai Mareko i ana tusitusiga.

*Sa masani ona fuafua a’oa’oga a Peteru i mea o lo’o tutupu e aunoa*

# EVAGELIA A MAREKO: O SE ĀTA FA'ATA'ITA'I MANUIA

*ma se fuafuaina fa'alelei i fa'aupuga a le Ali'i, ma na le afaina ai lava ona tusitusia e Mareko o nisi o mea sa ia manatuaina. Ona e tasi lava lona mafua'aga – aua ne'i misia se mea sa ia fa'alogo i ai, ma aua ne'i sesē o se fa'aupuga o mea sa ia fa'alogo i ai.*

O Eusebius (c.260 – 339 CE) na manatu o Kerisiano i Roma na tuleia Mareko e tusitusia a'o'oga na tautala ai Peteru. Mulimuli mai ai na fa'amausalīina e apostolo le Evagelia mo faiatauga i malumalu. E o'o lava i le au faiatau mai anamua sa le manatu o se galuega tusitusia na polesi lelei. Ua pei ose tusi āta a se aiga ua fa'amanatu ai le aiga.

O le tu masani lenei na tu'uina ai Mareko i Roma i le taimi o le maletile o Peteru i le va'aiga a Nero (c.64 CE). O le Tusitalatu'u Roma o Tacitus (c. 56 – 118 CE) na fai mai na filifilia e Nero latou sa inosaina sa mulimuli i se ituaiga o 'Keriso' sa fa'asatauroina e Ponesio Pilato sa fa'asalaina ona o se afi sa fa'aleagaina ai le 'a'ai mo le tele o aso.3 Na lapata'i e le Evagelia a Mareko o le a feagai atu pea atu pea le au fa'atuatua ma fa'asauaga lē talafeagai i le Mareko 13:13. O le tulimata'i o le inoino o lo'o lalaga i totonu o le Evagelia. Mo se fa'ata'ita'iga, o i si masalosaloga o le fa'auigaina o le fa'atusa o le Lulū Saito (Mk 4: 13 – 20) ua fa'atusatusa fatu ua ola mai ae ua mate ona e le'i i ai ni a'a, o tagata na mua'i olioli i lo latou fa'atuatua ae mulimuli ane na ta'itasi ma mou atu ina ua feagai atu i ni fili. I le va'aia o se ali'i mau'oa, o lē sa tausi i poloa'iga a le Atua ma le fa'amaoni i lona olaga atoa, na le talia le vala'au a lesu e lafoa'i uma ana 'oa ae fa'atasi atu ma ona so'o, ae na fia iloa e Peterun pe 'fa'apefea matou?' (Mk. 10: 17 – 31). O se upu

lē mautonu, 'ma fa'asalaga fo'i', ua fa'aleo mai fa'atasi ma folafolaga so'o se mea e lafoa'i e so'o ona o Iesu ma le tala lelei o le a toe taui taisautuaselau, 'i lenei olaga' (v. 30)

## Manatunatuga mo so'o na puapuagatia

O se leo pa'aā fou Enelagi o le feiloa'i atu i le tele o fa'aletonu ua ufitia ai tagata lelei ma le galulue, ma le, 'e tatau i le Atua ona faia se mea!' Na tuputupu a'e i se fa'ato'aga, sa taumafai o ia e ola pea le pisinisi ma tauri i matua ma aiga ua matutua ua alagatatau ai ona muimui ma faiatio. Ua sili atu ma le 90 tausaga o lo'o taumauga lava i lana fa'atuatua: 'au ai i le Misasa i aoauli o aso To'ona'i, au ai po'o le ā lava ni galuega e fai. E masani ona mafaufauina i lenei tinā po'o se ituaiga o tagata ia sa iloaina e Mareko i le seneturi muamua i Roma. Na mua'i tala'i ma fa'ailoa atu Keriso i tagata lutaia sa avea ma fai'oloa femalaga'i ma o latou o ni suli mai tagata sa fa'apologaina e fitafita Roma. O le tupu a Roma o Claudius na fa'asāina nisi o tagata lutaia mai le 'a'ai ona o le tete'e e uiga i se tagata lelei sa ta'ua o 'Chrestus i le c. 49 CE. Ina ua tusi Paulo i le au fa'atuatua i Roma c.57 CE, sa filogia tagata o le lotu – o lutaia ma latou e lē o ni lutaia na liliu mai ma manatu tete'e fa'alotoifale i le va o latou sa fa'aauau pea ona mulimulita'i i aganu'u lutaia ma le au fa'atuatua e lē o ni lutaia (Roma 14). A manatu atu la i le au aofia sa fa'alogologo iā Mareko, e tāua le manatuaina e lē o ni tagata e tulaga lelei, lavalava lelei, po'o ni tagata Roma mai ia tatou tusi a'oga e tautala i le gagana Latina. O latou o ni tagata faigaluega leipa e i ai o latou so'otagata i tagata mai Sasa'e, o lo'o tautala pea

i le gagana Eleni e masani o fa'alogoina i 'a'ai i Eleni. O le faia o ana tusitusiga i Roma i le tau fa'ai'ui'u o le seneturi muamua, 1 Peteru sa manatu o le au fa'atuatua o le a fa'asauaina pea ona o latou ua lauiloaina o Kerisiano (1 Peteru 4" 14 – 19).

Aiseā ua le puipuia ai e le Atua le au fa'atuatua mai puapuagatia? Ua masani Kerisiano i le tali e fa'apea o le Atua e tauavea puapuagatia fa'aletagata i le lē fa'asaoina o lona Alo pele. I le amataga lava o le Evagelia, na fa'alogoina e le au faiatau le leo mai le lagi o fa'amausalī le mafutaga fa'apitoa ile va o Iesu ma le Atua a o alu a'e Iesu mai lona papatisoga e Ioane le papatizo (Mk 1: 9 – 11). Ua fa'aoga e Mareko le fete'ena'i i le va o le malosi ma puapuagā e fa'ava'a ai le tala a le 'au'aunaga a Iesu. O le tu'u fa'atasia o ni vavega maoa'e na fa'ailoa ai le malosi o fa'ama'i, temoni ma le natura i tua atu o faiga masani a tagata. Ae ui i lea, o le motu o tagata sa tosiga atu iā Iesu, le na fa'amalōlō,, na fa'alavelave i ana fealua'iga, na fa'amalosia ai o ia e solomuli atu i vaega o le toāfa, po'o le mana'omia o le moega a se pipili e talepe ai le taualuga ina ia mafai ai ona o'o atu iā Iesu (Mk 2: 1 – 12). O latou ua fa'amaloloina fa'atasi ma a latou uō po'o mātua fa'anoanoa sa 'ai'oi iā Iesu mo ni fa'amalologa sa fa'aogā lo latou fa'atuatua o se filifiliga mulimuli. O le avea ma ta'uleleia i galuea'ia o ni vavega e tatala ai loto ma mafaufau iā Iesu o se mesia a le Atua? E leai. Pe ona o Iesu e masani ona tu'imomomoina e motu o tagata, po'o ona o ta'ita'i o lotu e masani ona sa'ili ni fa'amatalaga leaga e uiga ia Iesu, o tali i ana galuega e le manino mai fo'i.

# EVAGELIA A MAREKO: O SE ĀTA FA'ATA'ITA'I MANUIA

O Mareko e i ai lona mafua'aga e fa'aogā le ailililo, e poloa'ia e lesu le filemū. O temoni sa ia tuli'esea mai tagata ua fa'aiolaina lana pule o le "Pa'ia oe a le Atua" (Mk 1: 21 – 28). O se ta'aviliga leaga i se tagata e mafai ona pulea temoni ua fa'aigoa o se 'fai maneta', o lo'o galulue ma ni malosi'aga pogisā (Mk 3: 22 – 30). O tagata sa vavao atu e ia iā i latou e 'aua le ta'u i se tasi, ae ua atili ai ona latou tala'i atu ai lava (Mk 1: 43 – 45; 7: 36). O se faiga e pulea lelei ai lona tagata, o lenei faiga fa'alilolilo e le aogā. Na o'o lava ina ua taumafai e sola "ese atu i se nofoaga lilo ma ona so'o, sa lolofi mai pea tagata iā lesu sa ia fafagaina fa'avavega (Mk 6: 30 – 44).

I le malosi'aga ua ia maua ua manatu se tasi e fa'ato'ilalo e lesu ona fili e pei o le au temoni na ulutino i le lafu pua'a (Mk 5: 1 – 20). Ae o'o atu i le afa o le Evagelia, ua liua le tala. O le maitau a Peteru o lesu o le mesia a le Atua (8: 27 – 30) ua taia i se pā puipuia: o le valo'aga a lesu o le a ia puapuagatia ma maliu i lima o ta'ita'i lotu a Ierusalem ma toetū mai le aso tolu. E le'i fa'alogo Peteru i le folafolaga o le toetū. O lana tete'e na 'apoina le gagana na fa'aogaina ina ua

tuli'esea temoni. Ma na fai atu lesu iā Peteru e pei o ia o se tasi o nei temoni. Ae o le fa'aupuga "Auā e te lē loto i mea a le Atua, a o mea a tagata" (MK : 33) ua avea ma upu silisili i taimi o tulaga faigatā e masani ona sa'ili ai e tagata le Atua. Mo le 'au so'o, o le fetu'una'iga ile va'aiga a le Atua o lona uiga o le mulimulita'i i le ala o le koluse a lesu (Mk : 34 – 38). O taimi uma e toe fa'aleo mai ai le perofetaga lea, o le tuā'oi i le va o lesu ma ona so'o ua atili ona lautele. E le malamalama ae ua matata'u e fesili iā lesu (9: 30 – 32). A o latou savalia nai maila mulimuli aga'i atu i Ierusalem o muamua atu lesu iā te i latou, ua latou mulimuli atu ma le mata'u (10: 32 – 34).

O le aga'i atu i ni puapuagā e lē masani ai se toa. O fa'amatalaga fe'ilafi a Peteru e oti fa'atasi ma lesu na fa'aletonu i lona pala'ai na fa'afiti ai (Mareko 14: 27 – 31, 66 – 72). O la tatou va'aiga iā Peteru i le tala o se ali'i talavou faifaiva malosi na tagi masūsū i le fa'ai'uga. Ae o lo'o iloa lelei e le au faitau le tala ia Peteru i lana gaioiga lona lua i le Evagelia a Ioane na fa'ata'atia ai le galuega amata mo le Peteru ua toeaina ua ausia mea sa le mafai i lona talavou

ona faia i le mae'a o le toetū i le fa'atasiga i le matafaga o le sami o Tiperia (Ioane 21: 1 – 23). Ae leai se fa'aleleiga fa'apea i le Evagelia a Mareko. Ona o perofetaga uma a lesu e uiga i ona aso fa'ai'u na taunu'u, ma e fa'atuatuaina e le au faitau folafolaga mo se lumana'i fa'afouina – "a mavae lo'u toetū, ona ou muamua atu ai lea iā te outou i Kalilaia"(Mareko 14:: 28; 16: 7) ma "ou te lē toe inu lava i fua o le vine, se'ia o'o i lea lava aso ou te inu ai i le uaina fou i le mālō o le Atua (14: 25).

O le ulua'i tusitusiga a Mareko e leai se toetū na fa'alia. Na fa'ai'u "i fafine na sosola 'ese i le tu'ugamau, ua latou lē fai atu fo'i se upu i se tasi, auā ua matata'u"(Mareko 16: 8). O tausaga ta'itasi i le Sulufaga a Sagato Mareko (25 Aperila), o faitauga ua tu'u sa'o i se fa'ai'uga na fausia e le 'au tusitusi na mulimuli mai ina ia o gatasi lana Evagelia ma fa'amoemoega a isi Evagelia (Mk 16: 14 – 18). O ana folafolaga o so'o o le a fetagofi i latou i gata ma inu i se mea e oti ai e aunoa ma le a'afia ai ua 'ese mai le fa'amatalaga a le fai evagelia o le amiontonu i taimi o le lēmautonu, puapuagā ma fete'ena'iiga....fa'aauau pea.....


## PHOTO GALLERY



## PHOTO GALLERY



## PHOTO GALLERY



# FAITAUGA MO LE MASINA O FEPUARI 2021

## ASO 7 FEPUARI — ASO SA 5 TAUSAGA MASANI

Faitauga 1: lopu 7: 1 – 4, 6 – 7

Matua: Ua aoina ua 'ou lē mapu i le feliuliua'i.

Salomo: 147: 1 – 2 (tali), 3 – 4 (tali), 5 – 6 (tali)

Tali: E fa'amālōlōina e ia e ua loto momomo.

Faitauga 2: 1 Korinito 9: 16 – 19, 22 – 23

Matua: Oi Talofa iā te a'u, pe a 'ou lē folafolaina le Tala Lelei.

Aleluia, Aleluia...la manuia le tupu o lo'o maliu mai i le suafa o le Ali'i; o le manuia i le lagi, o le vi'iga fo'i i mea aupitoaluga ...Aleluia.

Evagelia: Mareko 1: 29 – 39

Matua: Ua ia fa'amālōlōina tagata e toatele na mama'i i ma'i.



### **Tofitofiga O le Upu:**

Ua tatou iloa i le fa'aupuga a Paulo ia Korinito o le autu lea i faitauga uma ia e tolu. O se elemene tāua i so'o se galuega o le 'loto malie i le galuega' – e le na ole malosi ma le taui e aogā – e pei ona ioeina e le to'atele o le a fa'alogo i nei upu – o se manatu o se tasi o lo'o fa'aalu lona taimi mo se mea e aogā. Mo le tele o tagata, aemaise i latou ua maileia i sosaiete e le faimea tonu – e le o se faiga lea. Mo latou ia o faitauga mai iā lopu o le a maula i ai se fa'amalos'i au – o le lē fiafia ma le fa'atauva'a o a latou galuega. O se mea fa'apenā pe moni mo isi mea e tele – ona o lo'o aga'i i le manatu atoa e uiga i le mafua'aga o le olaga, le uiga o le ola ai, ma le fesiligia o lenā moni, e o'o lava iā i latou o lo'o maua se olaga mafana ma le sa'oloto. Ua tagi aualofa lopu i lana vaega lea, ae i le faia o lea ua taulagia ai se alafua o le avea ma tagata. E mafai ona tatou maitauina le manatu o le taufa'asesē, o le leai o se uiga o le tele o gaioiga fa'atagata, ma e mafai ona aga'i atu i ni fa'alogo'aga ua faigofie ona malamalama i ai. O se

'ese'esega i se mea na fai mai ai Paulo: "Auā e ui ina ou sa'oloto mai tagata uma, ua fa'apologaina a'u e a'u mo tagata uma." Ua 'apo maia e Paulo lana auaunaga ona o le evagelia, ua lautogia ai galuega uma. E leai se fa'afitalui a Paulo i mafua'aga po'o uiga, ona o le fa'asoa i le evagelia, ua pau lea o fa'amanuiaga ua ia mana'o ai. Ma o le fe'au fo'i lea o le asō. O se va'aiga o ni gaioga e lē muta. Ua manumalō lesu i le tiapolo, fa'amaloloina o ma'i ma le tala'i atu ma le femalaga'i atu i Kalilaia e fa'aaauai ai le galuega. O le tāua o nei galuega ua motusia ona o faiga tatalo – ma o le feau o lo'o aumai o lo'o manino lelei, ona o tatalo ua mafai ai ona fa'atino nei galuega. O le 'mea lea na ou sau ai' – pau le fa'amoemoe a lesu o le ave'ese atu le avega mamafa o le tiapolo ma le fa'ama'i – o lana galuega lenā, ma le galuega a latou uma, e pei o Paulo, talia se fa'asoa i le fa'amanuiaga a le evagelia.

### **Metitasio o le aso**

#### **"O le mea lena na 'Ou sau ai"**

O le uluai matafaioi a le patele i lona tofiga, o le Auauna o le Upu a le Atua. Na fa'au'uina o ia ma auina atu e folafola le Talalelei o le Malo i tagata uma, e vala'auina tagata uma i le usita'i i le fa'atutua ma ta'imua i tagata ua talitonu i se fa'alautelega o lo latou atamai ma feso'ota'i mai Keriso ia i tatou. Ona o lenei le mafua'aga, o le patele lava ia e tatau ona muamua i mea uma e atina'e ai le tagata ia fa'amasani ma le Upu a le Atua. Ia malamalama i ona tusitusiga po'o ona itū loloto, e ui lava ina talafeagai tatau mo tagata, ae lē lava. E mana'omia lona feso'otai i le Upu ma le loto usitai ma le agaga tatalo, ina ia mafai ai ona āti loloto ona mafaufauga ma lagona ma aumaia i fafo se va'aiga fou ia te la - le agaga o Keriso (1 Co 2:16) – auā o ana upu ma ana filifili ma ona uiga e ono avea ma fa'aosofiaga sili, ma o se ata lafoia sili ona loloto, o se folafolaga ma o se molimau i le Talalelei.

Se'i vagana ua "tumau" i le Upu ona avea lea o le ositaulaga ma so'o atoatoa o le Alii. O le sini lena o le a ia iloa ai le mea moni ma fa'asa'olotoina moni ai lava, e manumalo ai i tu'utu'uga uma e fete'ena'i, po'o mea uma foi e ese mai i le Talalelei (Ioane 8: 31-32). O le patele e tatau ona "talitonu" muamua i le Upu, e le o "sana" mea, ae o Le na auina mai o ia. E le na'o ia e ana le Upu; i lona manatu, o ia o lo'o nofo aitalafu i le Tagata o le Atua. Fe-tau lelei, talu ai ona na te mafaia ma fa'atino le fa'aevangelia, o le patele, e pei lava o isi tagata uma o le Ekalesia, le alagatatau ona ola mataala, na o ia lava o lo'o mana'omia pea lona fa'atialeleiina. Na te folafolaina le Upu i lona tulaga o se "auauna," o se tagata e fa'asoasoaina le pule fa'aperofeta a Keriso ma le Ekalesia.

# FAITAUGA MO LE MASINA O FEPUARI 2021

## ASO 13 FEPUARI — ASO SA 6 TAUSAGA MASANI

Faitauga 1: Levitiko 13: 1 – 2, 45 – 46

Matua: O aso uma e i ai le ila iā te ia, e nofo to'atasi o ia i tua o le toāgalauapi.

Salamo: 32: 1 – 2 (tali), 5 (tali), 11 (tali)

Tali: O oe lava lo'u lafitaga, e te si'sos'i'omia a'u i siva o le olataga.

Faitauga 2: 1 Korinito 10: 31 – 33; 11: 1

Matua: la outou fa'aa'oa'o mai iā te a'u, pei o a'u iā Keriso.

Aleluia, Aleluia... Ua liu tagata le Upu, sa mau o ia ma i tatou. A o i latou uma o e na talia o ia, na ia avatu i ai lea lava manuia ia avea i latou ma fanau a le Atua ... Aleluia.

Evagelia: Mareko 1: 40 – 45

Matua: Na te'a loa le ma'i lepela iā te ia, ona mamā ai lea o ia.



### **Tofitofiga O le Upu:**

I le a'afia ai i le koviti 19 ma isi mau fa'ama'i ua tatou feagai atu i ai n, e ao ona tatou malamalama i se tulaga e uiga i le tagata ua ma'i i le lepela. Sa inosia ma fa'aese, e le mafai ona ola ai i se olaga e pei ona masani ai fa'asosaiete, e le mafai ona feso'ota'i atu i isi. E o'o lava i sosaiete e lelei le tulaga o le tausiga fa'asoifua maloloina, o fa'ama'i o se mea e fa'aosofiaina ai le mata'u ma le fefe, ona ua tatou iloaina e mafai ona fa'aleagaina ma fa'aseseina ai i tatou. O le mafua'aga lenā ua fa'aogā so'o ai le ma'i lepela o se fa'auigaina ole agasala. O le agasala e inosia ma fa'aleagaina; e vavae'eseina mai ai i tatou mai isi ma fa'amana tu mai pea i o tatou ma'ale'alegā le leai o se fa'amoemoe. O le mafua'aga lenā ua tāua ai tele gaioiga a lesu i le Evagelia o le

asō. Sa musu e vavae'ese mai o ia mai le lepela; sa ia pa'i atu i ai ma fa'apea atu 'ou te loto i ai (e fa'amaloloina oe).' O fa'ama'i pipisi i taimi o lesu o se sala oti lea – i le fa'asosaiete ma le fa'alatino. Mo Kerisiano, o le agasala o se fa'asalaga i le oti fo'i lea – ma e leai se togafiti mo agasala mai mafua'aga fa'atagata. Pau le fa'amoemoe o le 'ai'oi a le ali'i lepela: Afai ua e finagalo i ai, e te mafaia ona fa'amamā iā te a'u ma o le tali ua tatou talitonu o lea lava: 'Ou te loto i ai'. A o aga'i atu Kerisiano i le aletale o le fa'ao-lataga ua latou molimau mai: 'tau lava o lau fetalaiga ona malolo ai lea o lo'u agaga' – o lo tatou fa'atuatua i lē na fa'amaloloina le lepela i lona ma'i o ia lea na ala i lona maliu ma lona Toetū, ua mafaia ai ona fa'amaloloina i tatou mai iā tatou agasala ma toe fa'aleleia i tatou i lenei olaga.

17

### **Metitasio o le aso**

#### **Le Uiga o Mafatiaga o le Lepela**

E leai se sailotoga, ae o lenei: e i ai le fa'aaloalo a le Atua mo i tatou ... Afai e finagalo le Atua ia ona mauaina i tatou, e tatau ona ia fa'amalaia i tatou, auā afai e lē fa'amalieina i tatou e lona Mamalu, e mafai ona tatou lafoa'ia, e tauemuina ia, e sasaina ia, ma fa'asatauroina i le alaga fiafia a le tagata amio leaga. E lē puipuia e le Atua ia lava i lona malosiaga, ae na'o lona onosa'i ma lona matagofie ....

Mafatiaga! O lena le upu autū! O lena le tali mo so'o se ta'ita'i, o le fa'amagaloga mo so'o se amiogatonu, o le fua e lē mafai ona

sese mo so'o se matagofie e pala! E matuā mumusu tagata e malamalama i le mana'omia o puapuaga... E alagatatau mafatia-ga. O le ivitū ma o le ute foi lea o le olaga fa'aletagata. O se fa'ailoga vaiaia lea e iloa ai le alofa, ma afai ae misi lenei fa'ai-loga, lona uiga o lea alofa ua na'o se faiga fa'atalitane lona malosi ma lona matagofie. Ou te fai atu a alofa se tasi ia te a'u, pe a malie sea tagata e puapuagatia ona o a'u pe mo a'u foi.... E tasi lava le fa'anoanoaga, o le leiloa lea o le Togala'au o Fa'al-ogona Ofoofogia, ma e tasi lava le fa'amoemoe ma le mana'o e tasi e toe maua mai ai.

### **O LE VAITAU O LE FAGAFULU**

E fa'aoso fiafia pe a maitau atu, e le masani ai i faitauga, o lo'o i ai se sini autū i faitauga muamua o le vaitau o le Fagafulu i le Tausaga B. O se sini e feliuliua'i le manatu o le Feagaiga i le va o le Atua ma tagata a le Atua. O le faitauga mai le Feagaiga Tuai i vaiaso i luma ua tu'uina mai sina va'aiga i lenā Feagaiga: o le Atua na amata mea, na faia e le Atua ni folafolaga, ma ua taumauga i le Feagaiga, o le Atua e masani ona aumai se fa'ailoga o le Feagaiga, ma o tagata ua valauina ina ia fa'amaoni, ae masani e lē fa'amaoni, e toe fa'afou e le Atua le feagaiga.

Mo Kerisiano o lo'o faimalaga mai le Fagafulu aga'i atu i le Eseta, o lenei tusituisga a le Feagaiga Tuai ua aumaia se gagana malosi tele a le Feagaiga ma le faitaulaga, le ola ma le oti, agasala ma le fa'aolataga, o lo'o ulufia ai le sauniga atoa o le Vaiaso Pa'ia. O se tomanatuga i faitauga muamua i lea aso Sa ma lea aso Sa e fa'aoloaina ai le fa'atinoga o le Katesimo o le Fagafulu mo le au fai katesinmo – fa'apea i latou uma le au fa'atuatua.

# FAITAUGA MO LE MASINA O FEPUARI 2021

## ASO 21 FEPUARI — ASO SA 1 O LE FAGAFULU

Faitauga 1: Kenese 9: 8 – 15

Matua: 'Ou te manatua la'u feagaiga ua osia ma outou – e lē toe avea le vai ma lolo e fa'aumatiā ai mea ola uma.

Salamo: 25: 4 – 5 (tali), 6 – 7 (tali), 8 – 9 (tali)

Tali: Le Ali'i e, o ou ala uma, o le alofa ia ma le fa'amaoni i e ua tausī i lau feagaiga.


Faitauga 2: 1 Peteru 3: 18 – 22

Matua: O le vai o le lolo, o le fa'atusa lea o le papatisoga o lo'o fa'aola mai ai nei iā te outou.

Fuaiupu mo le Evagelia: E le na o mea e ai e ola ai le tagata, a o afioga uma e tulei mai i fofoga o le Atua.

Evagelia: Mareko 1: 12 – 15

Matua: Sa fa'aosoosoina o ia; sa auauna fo'i agelu iā te ia.



### ***Tofitofiga O le Upu:***

O le aso Sa muamua o le Fagafulu e masani ona amata i le tala o le fa'aosoosoga o lesu i le toafa – e fa'atulaga ai le fati mo le vaitau fa'anatura o le salamō ma fa'atāua mai ai le tutū fa'atasi o le Ali'i ma Kerisiano o lo'o sa'ilili e te'ea le agasala. I se isi manatu o le faitauga muamua ma le evagelia o le asō e uiga i nofoaga i le taufa'asi'usi'u, ma tagata i nofoaga e lamatia ai.

18

Na saogalemū Noa i totonu o le va'a a o fa'aleagaina mea uma ma tagata i ona si'osi'omaga; sa lagona e Noa le popolega ma le vaivai ma sa fa'amoemoe tele o ia i le upu a le Atua. Ina ua saogalemū ma fa'aolatia mai le lolo sa avatu i ai e le Atua se fa'ailogia e tumau pea le Atua ma le fa'atuatua i le Feagiaga na faia e le Atua ma ia.

I le Evagelia na auina atu lesu i le toafa e le Agaga, ma sa fa'atasi ai

ma manu fe'ai ma na fa'aosoosoina o ia – o se nofoaga e fa'amata'u ai – o se nofoaga i le taufa'asi'usi'u.

Atonu i nisi o taimi o le tele o tagata e o'o ai i le taufa'asi'usi'u, i tulaga o fa'aletonu ma ni lagona o le lēmautonu ma le leai o se saogalemū, le mea o lo'o i ai ni malosi'aga tetele o lo'o tau foufou mai, pe a leai se tali mautū, mafana ma le manino lelei. Pau mea sa ia Noa ma lesu o se folafolaga: Na tautala le Atua ia Noa, ma i le papatisoga o lesu na sao i luma mai o le fa'aosoosoga ma na fai atu le Atua 'O lo'u atalii'i pele lenei.' Mo Kerisiano, o le ola e foliga mai e i le taufa'asi'usi'u, le ola e mafai ona va'aia e ma'ale'ale. O taimi na tatou te talanoa ai i le fa'atuatua – fa'atuatua ma fa'amoemoe i le upu na tautala ai le Atua, o lē ua aumaia iā i tatou fa'ailogia (ma le moni) o le Feagiaga iā lesu.

### **Metitasio o le aso**

#### ***Toe Fuata'i Lou Olaga***

O le "ola mulimulita'i" o le upu sa fa'aaoga e Sagato Paulo e tusa ma amioga i le lalolagi, o le mulimulita'i la, o le auala faigofie e fa'afetaui ai a'u i mea uma ua faia o lo'o siosiomia ai a'u; ou te faia e pei ona fai e isi, ou te mulimuli i le tafe o le tai, ou te uia le auala e lē ma'alofia. Ae o le "toefuataina" o le tali atu ma le mafaufau loloto fa'asaga i manaoga o lo'u natura ma mea uma o lo'o a'afia ai lo'u siosiomaga. E lē mafai ona 'ou toe fausia lo'u lava agaga, pe mafai foi ona ou fa'aumatiaina, auā o le galue o le avanoa sili lea e feso'otai ai ma le Atua; ae ona o lo'u agaga na foa'i mai, o lo'o ia te a'u la le malosi e toefuataina ai mai ituaiga mea ou te faia. E fa'atapula'a a'u, ioe, i le mea lenei e tasi; ae o lenei mea ua na'o se fa'atapula'aina e mafai ai ona aumaia le

fa'amalamalamaga i a'u galuega lea semanu e misi. Afai e mafai ona tatou fa'aumatiā i tatou lava i o tatou loto, o le a lē faigata le oso vave o le maualuga o le tatou pule i o tatou lava ola.

O le tulaga lea, e mafai ai ona 'ou a'afia, mai i totonu o a'u lava lea e maua ai a'u galuega, auā o le fuata'ina e sua ai gaioiga o le agaga. E lelei pe a 'ou mafaufau i lenei mea, se'i vagana ua ou faia ma le fa'aeteete le tausiga o a'u, o le a faigofie ai ona 'ou fa'ataitai i le olaga ua siomia ai a'u. O le a 'ou toefuata'i i le agaga o le lalolagi ua fa'atofu ai a'u. Ae mo le ausia o lenei fa'afouga o le mafaufau, lea na 'ou faia ai le amio fa'a-Keriso, e tatau ona 'ou va'ava'ai ma le fa'aeteete ia te a'u lava, ma, fa'atusatusa a'u i le Fa'ata'ita'iga fa'ale-Atua, ona toe fuata'i ai lea o lo'u agaga i lena alafua atoatoa.

# FAITAUGA MO LE MASINA O FEPUARI 2021

## ASO 28 FEPUARI — ASO SA 2 O LE FAGAFULU

Faitauga 1: Kenese 22: 1 – 2, 9 – 13, 15 – 18

Matua: O le taulaga a Apera'amo.

Salamo: 116: 10, 15 (tali), 16 – 17 (tali), 18 – 19 (tali)

Tali: 'Ou te savali i luma o le Ali'i i nu'u o tagata ola.

Faitauga 2: Roma 8: 31 – 34

Matua: O le Atua sa na lē fa'asaoina lona lava Alo.

Fuaiupu mo le Evagelia: O le si'ufofoga o le Tamā mai le ao ua fa'apea mai, o lo'u Atali'i pele lenā, ia outou fa'alogo iā te ia.

Evagelia: Mareko 9: 2 – 10

Matua: O lo'u Atali'i pele lenā, inā fa'alogo ia outou te ia.



### **Tofitofiga O le Upu:**

O le faitauga muamua o le asō o vaega o faitauga mai le Kenese e uiga iā Apera'amo, na atia'e mālie mai i ni mataupu. O le vaega sili ona tāua o tala a Apera'amo o le fa'aogaina so'o o le mataupu i le Feagaiga. I le vaega o le faitauga o le asō o lo'o i ai se tulaga moni o le o'otia i le fa'aupuga e fai so'o: lou atali'i, lou atali'i e to'atasi, o lē e te alofa tele i ai.' O le manatu na fai atu le Atua iā Apera'amo e ave lona atali'i pele e fai ai le taulaga o le a lagona ai le mafatia i le to'atele ( o le ā lea ituaiga o Atua ua poloa'ia se faiga taulaga i se atali'i pele?) Ae ui i lea, o le lu'itau ua na ona fa'amalosia ai le malamalama'aga a le Ekalesia i nei faitauga o se fa'atagataina o le faigataulaga a lesu – 'Lo'u Atali'i pele lenā - e pei ona fai mai le leo mai le āo i le evagelia o le asō. I le fa'amatalaga na amo e Isa'ako fafie i luga o lona tua ma a'ea le mauga o se faigataulaga, ua tatou maua le si'uleo a lesu o amo lana koluse (i le tu masani a sinopi) i luga i Kalevalio e fai aii o ia ma taulaga ona o agasala a le lalolagi. Ua saunia ma le

mautinoa o le a tatou toe fa'alologologo i le faitauina o le Kenese i le sauniga Afiafi o le Eseta. Ona fa'apea ia lea o le fesili 'O le a lea Atua e faitaulaga i lona lava alo?'

I le palakalafa mulimuli o le faitauga o le asō o lo'o ta'ua ai suli a Apera'amo fa'atolu i le fa'amanuia; o latou uma ua potopoto mo le Eukalisititia e mafai ona fa'aioloaina i latou uma o ni vaega o lo'o a'afia ma i latou o suli fa'amanuiaina – Apera'amo, lo tatou tamā i le fa'atuatua (Tatalo Eukalisititia 1).

O le Evagelia mo le aso Sa lua o le Fagafulu e masani o le Liua o Fofoga. I upu o le tatalo tomua o le asō o le fa'amoemoe o le Liua o Fofoga o lesu a o galue i lana auaunaga: e fa'aiolo...o le Pasio e aga'i atu i le mamalu o le Toetū. O lenei evagelia ua fa'atulagaina i le vaitau o le Fagafulu e fa'amanatu ai i Kerisiano o lo'o 'au ai i le malaga fa'aleagaga o le Fagafulu a o latou sauniuni mo le matagofie o le patipatia o le Feagaiga o le Ali'i Toetū o le Eseta lea.

19

### **Metitasio o le aso**

#### **Le uiga o le Liutino-tagata o Keriso mo i tatou**

Mo le to'atele o i tatou ... o fa'alogo'aga lelei o le agaga e lē maua ona ua fa'atumulia i le tigāalofo ma popolega e masani ona tūsegi mai i le fa'amaoni ma le mea moni. O tatou loto e fa'alago-lago i le sosaiete o lo'o tatou ola ai e taumamao mai nai lo le Talalelei. O le mea lea e ta'u e Tama o le Ekalesia o le 'Puaoa o le Fa'atusa o le Atua' i le agaga ona o le naunau; o le molimau leiloa o tu'ufa'atasiga i le loto fa'ale-tagata ....

O lo tatou feso'otai atu i puapuaga o lesu, o ia lava na te vala'aua se suiga mo se malamalama fou i ala o le Atua o lo'o fa'atonutonua le amiotonu ma le alofa mutimutivale i foliga o le lalolagi. E avea o se fa'amamā'aga o le mafaufau ma le loto, e maua ai le alofa mutimutivale ma le fa'amasinoga tonu, ua lē gata o le mea e sa'o ua faia, ae o le mea fo'i e miti i ai so'o se

tagata e fai i lona malosi atoatoa ma le agaalofa. O se fulitua fa'amamāina o le tagata ia te ia lava, e avea ai ma fa'amaoniga o lo'o afio ai le Atua, ma mo le taimi muamua foi lea e mafai ai ona va'ai moni i le Atua.

O le Liutino-tagata o Keriso i luga o le mauga, e lē o se vaiga o le tino paia o lesu; o se va'aiga o lona tino o se tagata - o se va'aiga o le tagata moni lava. O le Tagata Fou i se natura fou ua fa'avaeina ia Keriso lava ia. Ina ua o'o mai le so'o i luma o le misitelio o le Liutino-tagata, na ia va'aia se foliga o ona lava fotoga moni na ia iloaina ae ua leva ona galo. O se ata o le fa'amoemoe, auā o le fa'anoanoa i le iloaina o le mamao ese mai le Ola Liutino o Keriso o le a fa'atutuanā'i, o le umi e te va'ai atu ai i lenei vaiga mata'utia ma le matagofie, o se ola tuputupua'e ma o se mautinoa lē taofiofia lea i aso uma o le Fa'atusa o le Alii. E lē ma'alofia le avea o i tatou ma tagata e alolofa i ai, ae o le alofa foi e fa'amautinoa ai.



# FAITAUGA MO LE ASO SA MUAMUA O MATI 2021

## ASO 7 MATI — ASO SA 3 O LE FAGAFULU

Faitauga 1: Esoto 20: 1 – 17

Matua: Na tu'uina mai e Mose le Tulafono.

Salamo: 19: 7 (tali), 8 (tali), 9 (tali), 10 (tali)

Tali: Le Ali'i e, o iā te oe upu o le ola.

Faitauga 2: 1 Korinito 1: 22 – 25

Matua: Ua matou tala'i atu iā Keriso na fa'asatauroina, o le mea tausua'i a'i tagata, ae peita'i o e ua vala'auina, ua fai Keriso ma mana o le Atua.

Fuaiupu mo le Evagelia: Inā salamō ia outou, auā ua latalata mai le malō o le lagi

Evagelia: Ioane 2: 13 – 25

Matua: Inā lepeti ia o lenei malumalu, ona 'ou toe faia lea i aso e tolu.

## FA'ASOLOGA O MISASA SAMOA MO FEPUARI 2021

20

Aso Sa Muamua			
7 Fepuari 2021	02:00 pm	Misasa Amata Kapelanisia 2021 Celebrants:	Cardinal John Dew Patele Maleko Patele Tuli Patele Peter
Aso Sa Lua			
14 Fepuari 2021	11:30 am	Naenae	Patele Tuli
	12:30 pm	Titahi Bay	Leai se Misasa
Aso sa Tolu			
21 Fepuari 2021	11:00 am	Newtown	Patele Tuli
	11:00 am	Porirua	Patele Andrew
	11:00 am	Te Wairua Tapu	Leai se Misasa
Aso Sa Fa			
28 Fepuari 2021	11:00 am	Lower Hutt	Patele Maleko
	11:30 am	Stokes Valley	Patele Tuli

## KALENA MO FEPUARI 2021

**06 Feb**

9:00 am—Misasa o le Waitangi Day @ St Mary's of the Angels

**12 Feb**

Fonotaga Kapelanisia @ Laumua o le Ekalesia

**Misasa mo le Fa'apa'iaina o Faia'oga**

Motu i Matū – 9 Fepuari 2021 i le 5.30pm malumalu o St. Mary of the Angels

Motu i Sautē – 12 Fepuari 2021 i le 5.30pm Our Lady of Perpetual Help, Richmond



Mikaele Teofilo:



m.teofilo@wn.catholic.org.nz



021 0818 5037



+64 4 496 1707



PO Box 1937, Wellington 6140, New Zealand